



Выходить каждого мѣсяца як прилога новинки: „Наш Родный Край“.
Редактор: А. Маркуш. Предплата Кч 6— на рок. Поодинокє число 60 гелеров.
Адрес: Вѣночок, Тячово.

РОЧНИК V.

ФЕБРУАР 1924.

ЧИСЛО 1.

ВѢНОЧОК ДО ПОДКАРПАТСКИХ ДѢТОЧОК.

Чекали вы довго, може думали, что вже и не прииду до вас. — И от я туй!

Приношу вам новѣ образки, новѣ казки, новѣ радости!

Обертайте мои листи. Читайте з них, что вам любитъся.

Я хочу, чтобы то все любилося вам. Зато, як видите, найдете на моих листах много такого, что вы самѣ пишете и збираете дома, в школѣ, в селѣ.

Так и треба. В наших домах, селах много таких казок, спѣванок и проговорок живе, яких треба нам собрати и напечатати. Абы знали их и другѣ дѣти, абы читали их всюды, куды Вѣночок дойде. Бо в сих казках, спѣванках и т. д. есть исторія и дух нашего народа.

Так, дѣти, я знову межи вами. И прошу вас не лиш читайте мои сторони, але и пишѣть.

Най буде Вѣночок новинка, котру Подкарпатскѣ дѣточки пишуть, читають и розпространяють.

Кличе вас до роботы и здоровляе вас:

ВѢНОЧОК.

М. Подгорянка:

МАМИНА КАЗКА.

(Орисъ Заклинской присвята.)

Мороз на шибках мерехтитъ,

Вѣтер вонка гуде.

Дѣвочка в постели лежить,

А мамка ще пряде.

Дѣвочки очи тулятся,

Як синій цвѣт до сну —

Усточка в просьбу тулятся:

„Ще казочку одну!“

Слухай голубко: „Быв раз царь

В тридевятой землѣ.

Мав он палату аж до хмар

И замок на скалѣ.

Золота зсыпав комор сѣм,

Войска мав без числа

И кождый день по свѣтѣ всѣм

Слава его росла.

Алѣ дѣтинки царь не мав,

Тому не був щаслив.

Письмо велике написав

И печать приложив.

Худобной мамцѣ загнав сам,

Тай просить так в письмѣ:

„За малу дѣвочку оддам

Богатства свои всѣ.

Дѣвочка з постели встае,

Ид мамочцѣ бѣжить,

Ручками шию обовѣ,

А голосок дрожить:

„О задарь просить он, задарь

Не приймай таких письм;

Менѣ за нич найбільшій царь,

Коли я твоя есьм!“

„Почекай любко, най повѣм

Казочку до конца;

Мамка печатей бе аж сѣм

И шле з письмом гонця:
„Не прийму державу цѣлу
З великим скарбом тым,
За одну дѣвочку малу
З серденьком золотым!“



Як став бѣдний чоловѣк мудрым.

(Казка.)

Давно, давно жив дагде на свѣтѣ бѣдний, пребѣдний чоловѣк. Не хотѣлося ему вже так много бѣдовати, задумав дачто и казав жонѣ: „Чуеш жоно, пойди в город та купи менѣ там бѣлый кафтан з чорным поясом и чорный ковпак, але довгій, якій лиш буде. Пойду я в свѣт, може найдеся якесь щастя.“

Жона послухала, собрала что найшла еще в хатѣ, та дала за кафтан, за пояс и за ковпак.

Бѣдний чоловѣк убрався в ту чудну одежу и пошов в свѣт. Ишов, ишов, раз в густом, великом лѣсѣ стрѣтив пару людей. Жона носила шовкову одежу, а сабля в чоловѣка была из золота. „Се навѣрно даякій король,“ думав бѣдний чоловѣк. И уганув. То поправдѣ був царь Жовтоѣ Краины, якій ходив на ловы. И доки зайшов меж корчи за яким то застрѣленным звѣрятком, освободився конь и лишив царя в лѣсѣ. Уже другого дня глядав коня. Раз, что дуже любив того коня, а другійраз не хотѣв пѣшком вернути до царского города. Бо ганьбився дойти без коня.

Царь задивовався над чудно убранным чоловѣком и зазвѣдав его: „Что ты за один.“ А бѣдний чоловѣк каже ему: „Я мудрець, премудрець. Знаю, что было, есть и буде.“ Зрадовався царь на сесѣ слова и каже: „Та скажи менѣ, ты мудрецю, что где бы найшов я моего коня.“ Подумав чоловѣк: „Что бы одповѣсти, абы не было бѣды и не выйшла скоро брехня.“ И каже цареви: „Твой конь конець лѣса а два вовки тягнуть его. Аж пилуеш сею дорожкой, може еще высвободиш его.“ Бѣдний чоловѣк казав се лиш

за то, абы чим легше освободитися од царя. А чуйте такое, царь побѣг дорожкой и дѣйстно найшов коня, якого мало не роздерли вовки. Царь вернувся скоро на кони, абы подаровати мудрого, но того уже нѣгде не было.



Пошов царь в свой город и дав выголосити, что если увидит дакто мудреця, чоловѣка в бѣлом кафтанѣ з чорным поясом, мае привести его хоть красно, хоть силою в царскій двор.

Другого, третого дня имили вояки мудреця на дорожѣ и привели до царя. Напудився теперь бѣдный чоловѣк. Ой Боже, что тут буде, може и завѣсити его царь, зачто так одурив го.

Але царь, не обы сердився, но дуже подяковав что помог ему найти драгоцѣнного коня. Подаровав ему велику палату недалеко од своеѣ и розказав всѣм слугам, абы честовали мудрого чоловѣка и слухали на него, як на самого царя.

Добро ишло по сему бѣдному чоловѣкови. Привѣз до себе и жону свою и жили собѣ в палатѣ, як в раю.

И случилось раз, что из царскоѣ палаты украли мѣшок повный золотом. Призвав царь всѣх радников, але нѣяк не могли порадити, что ба где бы глядати мѣшок из золотом. Призвав царь и мудреця. А може он знае. „Если поправдѣ такой мудрець, что знае все, тогды мусить знати“, говорили завистнѣ придворнѣ. А царь казав: „Абысь знав, мудрецю — премудрецю, на завтра хочу знати, что кто украв мѣшок

з золотом. Если не скажеш, може и голова не твоя буде завтра.“

Зажурился бѣдный чоловѣк. Сидѣв смутно в комнатѣ и роздумовав, як бы выкрутитися еще раз из бѣды. А як сидить при столѣ, дакто заковтае в окно и шепче ему: „Чуй пане, я украв мѣшок, но помилуй мене, а не продай цареви, бо он завѣситъ мя. Туй и мѣшок, лиш не кажи нѣкому.“ А мудрець казав: „Щастя, что прійшов ты еще нынѣ. Завтра было бы уже поздно.“ (Мудрець думав на себе, а злодѣй на себе.) Но теперъ иди положи мѣшок в царской загородѣ под третю яблоню.

Рано, еще ледвы зоряло, заслали придворнѣ люде до мудреця, а тот казав: „Най прійде сам царь, ему скажу.“ Прійшов царь а мудрець каже ему: „В твоѣй загородѣ, под третьей яблонѣ есть мѣшок.“

Дав царь глядати под третюю яблонею и поправдѣ найшли там мѣшок з грошми. Теперъ мав еще славу бѣдный чоловѣк. Але из славою росла и зависть царских порадинок. Зачали они клеветати на мудреця, что не знае он нѣчого и грошѣ сам украв. Доти клеветали, что пристав царь на то, абы взяти его ещераз на пробу.

И выдумали сякое: Взяли клѣтку из потятком. Один з них имив потя, другій держав клѣтку. Пустили потя раз. Оно вернуло в клѣтку. Пустили другійраз. Потя опят залетѣло в клѣтку. Пустили третійраз, а потя теперъ полетѣло и сѣло собѣ на дерево. Призвав царь мудреця и казав ему: „Если ты мудрець и знаеш, что было и буде, скажи, что робили перше мои слуги.“

Настрашився бѣдный чоловѣк. Як мог бы он то знати. И задумав сказати правду цареви. Признатися, что он простой бѣдный чоловѣк. Зачав говорити о себе: „Йой, пане, всемогутный царю. Слухай правду. Бѣдне потятко двараз забилося в клѣтку и освободилося, але третійраз...“

А царь думав, что мудрець не за себе, але поправдѣ за потя говорить и закричав на злорадников: „Видите, что уганув. Вы брехачѣ, вы клеветники.“

И подаровав бѣднаго чоловѣка великим богатством.
А од тогды жив собѣ спокойно мудрецъ, царскѣ слуги не
смѣли вже на него клеветати. Еще и нынѣ жие, если
не умер.

(Ужгород.)

Подала:
Р. Голдбергер,
учен. р. гор. школы.



ДѢТОЧѢ ПРОГОВОРКИ.

Путудром — путудром,
Босорканя под вѣдром,
А я ишов воды пити,
Хотѣла ня затопити.

*

Ой Иванку, Иванку,
Упадеш у солянку;
Красше пиши на листѣ,
Та не роби мазанку!

Драговскѣ школярѣ.

Коло млина, коло броду;
Перескочив Иван воду.
Перескочив не змочився,
До дерева прилѣпився.

(Пудпленя.)

А. Вѣланич, гимн. Хуст.

Наша хата не пуста,
Варится в нѣй капуста,
То на горѣ, то на торѣ капуста.

А в капустѣ бураки,
Побилися вояки,
То на горѣ, то на торѣ вояки.

(Ясѣня.)

В. Смирдуль, уч. рѣзб. школы.



Як потята спѣвають.

В зимѣ нападе густый снѣг и прикрые всяке зерно. До
того ще и мороз, что пса шкода выгнати. Тогды маѣ по-

тятка приходять з лѣсов до сел и просятъ милость у добрыхъ людей.

Синичка спѣвае: „Зима, зима, мороз! Зима, зима, мороз!“ Дѣти отворѣть окно, дайте ей мало крышок, най не просить дармо!

Кос поскакуе по снѣгу передъ чоловікомъ и жалуеся: „Мои дѣтатка, убожатка, змерзнуть!“

Милый зимный гость жовтюшка такожъ глядае страву, приходитъ аж до окна, сяде собѣ и заспѣвае: „Дай, зрно, дай!“



Оленка на гостинѣ в Вуйка Бурмилы.

Не онъ такъ далеко, дагде в найтемнѣйшихъ Карпатахъ жила собѣ честна фамилія Вуйко Бурмило, его жона Бурмилиха и малый панчукъ Бурмилко.

Не была то така звичайна, проста фамилія — старый Бурмило быв из дворянского роду — за то и не жили всюды по гаврахъ, но поставили собѣ красну, смерекову хижочку серед лѣса.

Одноѣ недѣлѣ Бурмилиха наварила кашу на обѣд — но бо вон красне сонце грѣло и каша дуже горяча была, выйшла цѣла фамилія мало проходитися передъ обѣдомъ. Лише на минутку, доки каша стыне.

Малый Бурмилко дуже радовався свѣжому воздуху, нѣяк не мав дяки вернути про медову кашу: Сяк и пойшла цѣла фамилія мало подальше од хатки. И от. За той час,



стравы. Не была бы Оленкою и дѣвчиною, кобы была не зайшла подивитися ближе: Яка то страва на столѣ. Подивилася, попахала, и потом и покушала. — В одном блюдѣ

одки, одки нѣтъ грибовъ збираюча Оленка приближалася до хатки и як цѣкава дѣвчина заглянула в отворене окно.

А что там видѣла? В хижи стол, на столѣ великѣ блюда а в блюдахъ страва. Коло стола малый столик а на столику в мисочцѣ повно-повно

стравы. Не была бы Оленкою и дѣвчиною, кобы была не зайшла подивитися ближе: Яка то страва на столѣ. Подивилася, попахала, и потом и покушала. — В одном блюдѣ была страва за горяча, в другом за товста. Но в малой мисцѣ, як май добра — солodka каша, в молоцѣ варена, медом обсыпана. Сѣла Оленка на столик, кушала, кушала, доти кушала, что зѣла всю кашу. И не подумала на то, ци яло, ци нѣтъ в чужой хатинѣ



гоститися — коли нѣкто не зве, анѣ не силуеть — и то не смутило еѣ, что коли стала од обѣда, перевернула стол. А порцеланова миска упала и розбилася на маленькѣ куски.

Оленка чувствовалася, як дома. И послѣ доброѣ гостины глядала мѣсто, где


бы мало спочинути. Та и найшла в другой комнатѣ двѣ постели и колысочку. Одна постѣль была за тверда, друга за широка а колыска як май на вдяку Оленцѣ — лягла собѣ и солодко заспала.

Але и малый Бурмилко поголоднѣв уже. — Вернулися, абы загостилися недѣльною кашою.

Зайдуть в хату и зачудуются. — Даяк хатка не в таком порядку, яку еѣ лишили. Роздивляться — раз каже Бурмилко: „Кто ѣв з моеѣ каши?“ А



О.К.



О.К.



каши, так полюбилася ему дѣвчинка — „Ой як добре буде з нею бавитися!“ радовався.

Старый Бурмило еще сердито махав з топориком и морконѣв, но Бурмилиха тихомирила его — что казати и

ей на вдяку была Оленка.

Але Бурмило не знав успокоитися. Чобы дакто смѣв в его дворянску хату запхатися и там самовольно газдовати. Доти морконѣв, что Оленка пробудилася.

Се уж не было таке солодке, як медяна каша. Лежати в колысцѣ, а



недалеко од неѣ паскуднѣ медведѣ розшкѣряють зубы. На щастя утѣмила Оленка в стѣнѣ дѣрочку, котра Бурмилковислужила подаколи мѣсто дверей, коли еще меншій був.



О.К.

Та и не подяковала за гостину. Та и не обернулася назад. Бѣгла, бѣгла, что и вѣтер не знав еѣ догонити. И не стала лиш дома.

Не казала нѣкому, куды ходила. Но я думаю, что большераз не зайшла в хижу, где нѣкого не было дома и не сѣла за стол, коли нѣкто не силовав.



О.К.

СИРОТА.

(Народна пѣсня.)

Нема кому порадити,
Нѣ розвеселити.
Пошла моя порадонька
В сыру глинку гнити.

Ой у звоны зазвонили,
В органы зайграли,
Коли мою родну мамку
В цвинтарь поховали.

Лишила ня моя мамка
На чужіѣ руки,
Впали на ня на сѣм свѣтѣ.
Всѣ нещаснѣ муки.

Якѣ тотѣ цвѣты краснѣ,
Котрѣ зацвѣтають,
Якѣ тотѣ дѣти щаснѣ,
Котрѣ матѣрь мають.

(Косовска Поляна.)

Подал:

Мих. Мандзюк,
уч. гимн. Берегово.



Когут и курочка.

(Народна казка.)

Быв дѣдо и баба. У бабы была куриця, а у дѣда когут. Баба все мала грошѣ, бо все понесла по яйцю продати. А дѣдови было жаль. Розсердився и прогнав когута. Пошов когут смутно. Иде, иде стрѣчае медвѣдя. Тот пытаеся: „Де идеш, когуте?“ Каже когут: „До царя на войну“ А медвѣдь силуеся: „Иду и я, буду тобѣ на помоч.“ Когут каже: „Стань из заду, та идѣм“.

Идутъ далестрѣча, ють вовка. Вовк пытаеся: „Де идеш, когуте.“ „Иду на войну.“ „Иду и я, буду ти на помоч.“ А когут каже и тому: „Стань из заду, та идѣм“.

Стрѣчаютъ лисицю. И тотъ звѣдаеся: „Де идеш, когуде.“ „Иду до царя, на войну.“ Лисиця проситьсѣ: „Иду и я, буду ти на помоч.“ А когут и той: „Стань из заду, та идѣм.“ Та идуть.

Прийшли до царя, когут вылетѣвъ на ворота и запѣвъ: „Ку-курѣку-га-гу, туй ем пресвѣтлый царю“. Царь подивився и розказав слугам: „Идѣть, та мѣж кури покладѣть“. А они пустили их меж кури. Когут тогды казав: „Пусти, заду лисицю! На то вылѣзла лисиця и позаѣдала и убила всѣ кури.

Царь розсердився и розказав заперти их мѣж конѣ, думав, що конѣ забудуть когута. А когут казав: „Пусти, заду вовка.“ Скочив вовк меж конѣ, та позабив их до одного.

Теперь сердився еще царь. Дав их заперти меж волы. А когут каже: „Пусти, заду, медведя.“ Пустився медвѣдь меж волы и роздер их до одного“. Царь тогды, абы освободився од когута, верг его в комнату, где царскѣ скарбы, грошѣ, срѣбло и золото стояли. А когут лиш того чекав. Жер грошѣ, срѣбло и золото. — Не лишив анѣ крышку из них.

Царь од гнѣву не знав чого робити, дав нагнати войками когута. Але и когут змагався, не могли его догонити. Только, як дуже пиловав, загубив один геллер. Прийшов до дому, став под окном и каже дѣдови: „Постели скоро верету на стол и под стол.“

А дѣдо закричав на него: „Чому, абысь поваляв?“ А когут знов кричить: „Стели скоро верету.“ Ледвы постелив дѣдо, когут став в окно, потряс крылами и як зачали ляться грошѣ в комнату, текли, текли, что повно было на столѣ, под столом, по всѣй комнатѣ. Пошов дѣдо до бабы за мѣркою, чтобы помѣряти грошѣ. Бабѣ казав, что рѣпы купив. Але одно золото прилѣпилосѣ до мѣрки.

Прийшла баба до дѣда и дозналасѣ, что одки достав дѣдо грошѣ. Нагнала и она курицю про грошѣ. Пошла курка.

Ишла, ишла, та найшла геллер, что когут утратив. Вернула до дому и каже бабѣ: „Стели верету на стол и под стол.“ Баба зрадовалася и постелила найкрасшу верету. А курка поваляла верету и поклала на ню геллер. Баба погнѣвалася и зарѣзала курицю.

Доси было, сяк было. Кто не вѣруе, най позвѣдуе когута, котрый еще и нынѣ живе и пѣе: „Ку-курѣку-га-гу постели верету.“

В.-Бычков.

М. Белей.

ученик гор. школы.



НАРОДНА СПѢВАНКА.

„Пойду я ся искупати
На широку рѣку.
Та пойду из Ясѣньчка
Аж у Америку.

Ой пойду я в Америку,
Бо там добре жити.
Бѣда буде в Ясѣньчку
Так тяжко робити.“

„А я буду в Ясѣньчку
И тяжко робити.
Бо я свою родну землю
Не годен лишити.“

(Ясѣня.)

Олена Митничук,

учен. нар. школы.



Як жие вовк у зимѣ.

Вѣтер вѣе, гуде по лѣсѣ. Всѣ дороги засыпанѣ снѣгом, усѣ стежки заметенѣ. Товстым ледом покрылися озера и рѣки. Все, что жие, поховалося до темных хат, до нор и печер. Лише сѣрый вовк блудить по лѣсѣ, не мае пристановища.

Страшный голод гонить его по дебрях, по лугах. Нѣ

в день, нѣ в ночи не мае спокою: голоднѣе, страшно голоднѣе.

Медвѣдь — Бурмило, найстаршій звѣрь у лѣсѣ, залѣз у теплу гавру та и спить собѣ безпечно. Знайшли теплу нору и лис и борсук и кртиця.

Навѣтъ заяць, хотѣ якій дурень, прожие зиму весело. Бѣгае собѣ в теплом кожусѣ, та обгрызуе молодѣ голузки.

Лиш одному вовкови не солодко жити в зимѣ. Его трызе жура, як бы добыти поживы, та прожити якось до весны, до сонѣчка ясного, коли вже можно ловити малѣ невиннѣ сернята.



Чи знають скоти раховати?

Не одповѣжте так наскоро, без думаня! Бо не так легко одповѣсти.

Были ученѣ люде, якѣ довго-довго ламали мудрѣ головы на том вопросѣ м не знали одповѣсти.

Сесѣ серйознѣ, страшно ученѣ люде замѣтили на пр. ось сакѣ дробницѣ:

Была стара котка, яка мала пять котят. Одного дня одобрали од неѣ котята. Мати-котка ревала и глядала котята. Дали ей назад одно — дале ревала, дали и друге. Еще ревала. Дали третье, четверте — лише ревала. А дали и пята — перестала ревати. Что кажете, чи знала раховати?

До саду одного огородника постоянно приходив черешнѣ обдзобовати, красти — шпак.

Огородник погнѣвався, зачав сторожити под черешнею, абы застрѣлити злодѣя. Але шпак все почекав, доки сторож вернув из саду. Огородник выдумав чось нове. Послав трьох людей в сад. Один з них зараз и вернувся. А други чекали. Думали, что шпак прійде и застрѣлять его. Одойшов и другій чоловік а шпак сидѣв далеко на деревѣ, но на черешню не прилетѣв. Одойшов и третій чоловік. И тогды прилетѣв шпак. Огородник з окна дивився, як солодко грызе злодѣй дорогу черешню. — Скажѣть, ци знав шпак раховати, або нѣт?

В лѣсного сторожа був пес из котрым кожного третього дня ходили в лѣс. Раз подумав лѣсник пойти сам и запер пса в хлѣв. Другій раз, коли опять треба было ити в лѣс, пса вже рано не было дома. Пошов лѣсник сам и от пес чекав его на дорожѣ, конець села. И од тогды кожного третього дня там чекав пес на лѣсника, абы не мог его дома лишити.

Что думаете, ци знав пес раховати?

Сѣ исторійки малѣ дробницѣ. Но варта мало роздумовати над ними. И над вопросом, ци знають скоты раховати, ци нѣт.

Та роздумуйте! А кто замѣтив уже и сам подобнѣ случаѣ, або мае здоровѣ думки на сей вопрос най, напише до Вѣночка. Найлѣпшѣ письма выпечатаеме и авторам зашлеме по одной книжцѣ.



СОДЕРЖАНИЯ:

Вѣночок до Подкарпатских дѣточок	стор.	1.
Мамина казка — М. Подгорянка	"	2.
Як став бѣдный чоловік мудрым — Р. Голдбергер	"	3.
Дѣточѣ проговорки	"	6.
Як потята спѣвають	"	6.
Оленка на гостинѣ в Вуйка Бурмилы	"	7.
Сирота — Мих. Мандзюк	"	12.
Когут и курочка — М. Белей	"	12.
Народна спѣванка — О. Митвичук	"	14.
Як жие вовк у зимѣ	"	14.
Ци знають скоти раховати	"	15.



Выходить каждого мѣсяця як прилога новинки: **»Наш Родный Край.«**

Редактор: А. Маркуш. — Предплата Кч 10'— на рок. Поодинокое число 1 Кч.

Для школярѣв: на рок 6 Кч, поодинокое число 60 геллеров.

..... Адреса: **»Наш Родный Край« Тячево.**

Рочник VIII.

Септембер 1926.

Число 1.

ТА ЩО МЕНЬ...

Та що мень из спѣванок,
Що спѣвати знаю,
Коли я до спѣваночок
Голосу не маю.

Та що мень из спѣванок,
Щом спѣвати годен,
Я бы спѣвав цѣлый тыждень,
Кобым не голоден.

(Ясьня)

Подала: ОЛЕНА МИТНИЧУК



Людоѣд.

Жив дагде лихий людоѣд, та ще дуже выбирав у стравах. На кождый тыждень треба было ему принести молоду дѣвицю. До сего людоѣд був великим демократом. Не хотѣв, щобы скарги пошли на него, що он — нѣбы то — коло богачов, або коло бѣдных. За се прийшлося в недѣлю всѣм дѣвчатам тягти жеребок. Случилося, що раз вытягла сей смутный жеребок сама королѣвска донька.

Зажурився король, бо людоѣд був сильнѣйший, як он. Выголосив по цѣлой державѣ, що дає королѣвну за жону, а ще половину державы тому, кто задусить Лихого людоѣда — и ратує его доньку.

Вчув сю вѣстку старый, выслуженый вояк. Подумав, спробовати щастя. Рушив у дорогу просто до замка Людоѣда.

Як иде широким степом, видить, серед степу лежить здохлый осел а над ним сважаються: лев, медвѣдь, орел, та муха-спѣвуха.

Приступить до них вояк, та каже: »Чому вам сважатися; коли ваша дяка, я роздѣлю вам добычу по ширости!«

Пристали на се всѣ. Вояк подѣлив, що орел та муха достали чисте мясо — а другим остались самѣ кости.

Радовалися орел та муха. Орел вытяг из крыла одно перце та и каже: »На тобѣ се перце, коли ним махнеш, то перекинешся в орла и можеш летѣти, куды хочеш!«

Муха спѣвуха сѣла ему на руку та поцѣлювала малым носиком та казала: коли доткнешся перстом до сего мѣста, то перемѣнишся у муху и не буде перед тобою дверей и замков!«

Приступили и медвѣдь и лев, щобы подаровати вояка. Лев казав: »Приступи ближе, най потисну ти сердечно руку, що дѣлила!« А медвѣдь говорив: »Пой, солодкий брате, най тя обойму, най тя поцѣлю!«



Алеж вояк не напудився од сих ласкавых слов. Махнув орлячим перцем. В той хвилѣ став орлом, поднявся у воздух и полетѣв. Летѣв, летѣв, анѣ не став, доки не долетѣв до замка Людоѣда.

Ще прибив на вчас. Королѣвна была вже у замку, але ще жила. Бо королѣвна была дуже худонька, слабенька, за се Людоѣд замкнув єѣ у тюрму, ще и ланцом приковав, та поставив перед неѣ всякѣ добрѣ стравы и напоѣ. Хотѣв, щобы ѣла, пила и мало утыла.

Дознався вояк, що де сидить королѣвна. Перекинувся у муху-спѣвуху та и залетѣв до тюрмы. Королѣвна зрадовалася, коли муха забренѣла коло неѣ. Але як напудилася, коли из мухи став коло неѣ дораз чоловѣк; а ще вояк. Не было чого боятися. Вояк сказав, що он приходить од старого короля, та хоче єѣ освободити. Радилися, думали, як бы то было. Та засмутилися обоє. Бо замок стояв

на высокой скалѣ. Из него не было выхода. Мог одси выйти або сюды приходити только Людоѣд, та кого он повѣв за руку.

Зажурился вояк. Дуже полюбилася ему королѣвна. Теперь вже буде, що буде, хотѣв еѣ вывободити. Перекинувся опять в муху та полетѣв пороздивитися у замку, а може дащо узнае, дащо увидить.



Залетѣв и до кѹхнѣ, де варили, пекли. Сѣв на окно и прислухуеся. Кухарки говорятъ: »Ой так, и наш газда Людоѣд, и королѣвна и мы всѣ

освободили бы ся, колиб дакто принѣс душу нашего Людоѣда!« — »А он не має душѣ?« — »А де его душа?« — звѣдали служницѣ. »Его душа замкнена у золотой коробочцѣ. Коробочка лежить на самотной скалѣ, дагде серед Чорного моря. Кто бы принѣс ту коробочку, освободив бы нас всѣх!«

Муха спѣвуха доста чула. Перекинулася в орла. Поднявся орел, летѣв, летѣв два днѣ и три ночи. Аж тогды втямив серед моря самотну скалу а на нѣй блискучу, золоту коробочку.

Вхопив коробочку. та вернувся назад. Долетѣв правѣ в хвилѣ, коли Людоѣд хотѣв вже задусити королѣвну.

Перекинувся скоро у вояка та и закричав на Людоѣда: »Не доткнися до неѣ, почекай, я вас всѣх освободжу!«

Засмѣявся Людоѣд: »Як бы ты мог освободити

нас всѣх? Хибаж мог бы ты найти золоту коробочку з моею душою. Я сам еѣ глядав та не найшов!»



«А я еѣ маю ось тут!» — закричав вояк и подав Людоѣдови коробочку.

Отворив Людоѣд коробочку. В той минутѣ зверг из себе тѣло страшного Людоѣда и став прекрасным королевичем.

Чому казати дальше? Было радости, было и весѣля. Може ще и до нынѣ свадьбують. Найдѣть их пойдѣть до них у гостѣ.



СПѢВАНКА.

Ой, бо мене заставили
Горох молотити,
Кури яйця погубили
Хотѣли ня вбити.

На припѣчку молотив,
На запѣчку вѣяв,
Под припѣчком изкопав,
Пшеницѣ поспѣяв.

Подав: НИКОЛА КАРАБИН
ученик горож. школы Волове.

Циганин и пан.

Жив собѣ дагде циганин та дуже розумѣв до свого ремесла. Руки в него были, як бы медом помащенѣ. Куды не поверне, все прилипне до его рук.

Вчув се пан, одказав циганинови, щобы прийшов до него. Прийшов циганин до пана, а той ему и каже: »Чуеш, циганине, маю я у хлѣвѣ чорного коня. Укради его сеѣ noci. Як украдеш, буде твой, а як нѣт, то вычислятъ тобѣ 25 палиць на хребет!« — »Добрѣ,« — казав циганин.

Пан поставив у хлѣв трьох слуг. Одного посадив на коня, другий держав коня за мотуз, третій за хвост.

Циганин вбрався у бабску одежу, купив у корчмѣ фляшку руму. Понад вечер зайшов у панский двор и почав йойкати: »Не дайте души погибати!« Пожаловали слуги бабусю, пустили в хлѣв. Баба лягла у солому та и заспала. Алеж слуги почувли, що дащо пахне. Найшли фляшку тай и подпивали собѣ. Доти пили, що задрѣмалося им. Баба встала на то, одвела коня и поставила мѣсто него терлицю.

Прийде рано пан. Вже з далека кричить: »Проклятѣ злодѣѣ, украли од вас коня!« »Де украли,« — говорять слуги. Тогды увидѣли, що то терлиця а не конь.

Прикликав пан опять циганина и каже: »Так до завтра вкради золотый перстень моеѣ жоны. Коли вкрадеш, то буде твой, а коли нѣт, даш назад коня та ще и 25 палиць достанеш!« — »Пристаю,« — говорив циганин.

Радовався пан, що пристав циганин на сяку токму. Але боявся, що од слабенькоѣ жоны ще

поправдѣ украде циганин перстень, за то взяв его сам и надѣв на малый перстик. Там носив его цѣлый день, так и ляг спати.

А циганин прикрався у ночи под постѣль.

Пробудився рано пан, подивився на руку, та успокоився. Каже жонѣ: »На жоно перстень, держи его, доки я умыюся!«

Жона была ще заспана, але взяла перстень.

Циганин чекав мало а потом каже: »Давай, жоно, перстень, я вже умывся!«

Дала жона перстень, а циганин тихо выступив через окно.

Прийде пан, просить назад перстень. Жона ще почала сважатися, що в сѣй минутѣ его вернула. Розлютився пан, але що мав робити — коли токма была сяка.

Прикликав опять циганина, та каже сердито: »Вкради мою жону, або верни менѣ и коня и перстень!« »Пристаю,« — говорив циганин — »украду я и тебе, пане!«

Того дня поѣхав пан з жоною на торг. Пошов там и циганин. Циганин купив пару чобот. Пополудню, коли пан думав вертати з торга, вийшов циганин на дорогу и верг один чобот серед дороги, а далѣ, на пятьсто метров верг и другой. Сам сѣв собѣ на дуплату вербу при дорозѣ.

Паны ѣхали у замкнутой кочіѣ. Погонич утямив перший чобот та казав: »Що менѣ из одного, кобы й пара была.« Не став з кочією, ѣхав дале. И от, увидеть и другой чобот. Злѣз из кочіѣ, та вернув пѣшком за першим чоботом.

Циганин лиш сего чекав. Прискочив до кочіѣ: Завязав добрым мотузком дверѣ та и погнав.

Втямив раз пан, що вже лишили их село. Заклопкає на погонича: »А куды ты женеш?«

Засмѣся на него циганин: »Та то я пане, вкрав панѣю, вкрав и вас, та ще и конѣ жену!«

Нѣщо было сердитися. Вытокмився пан з циганином. Купив ему гуслѣ та червенѣ ноговицѣ. Од тогды циганин залишив красти и ходитъ гусяючи по селах.

Коли стрѣнете его, зазвѣдайте, як то было з паном.

Подав: ДМИТРО МЫШАНИЧ

ученик горож. школы Волове.



ОЙ, Я ХЛОПЕЦЬ!

Ой, я хлопець молоденький,

Лише до розбою,

А як вийду на улицу,

Гусяти ся бою.

(Синевир-Поляна)

Подала: ВАСИЛЯ КОВАЧ.



Полева царѣвна.

Была то дѣвчина-царѣвна, та вдалася дуже гордовитою. Бывало возитися по дорозѣ а прислужники-генералы кѣряють из дороги всѣх простых людей. Горда царѣвна не могла анѣ дивитися на бѣдноту, — только на генералов, та царѣв.

И от, раз, як было, як не было, генералы заспали, або не добре уважали, доста що один ободраный жебрак дойшов аж сперед царѣвны, до еѣ найсвѣтлѣйшоѣ кѣмнаты.

Заревала царѣвна, увидѣвши цуравого жебрака: »Гей, слуги генералы, вон одси из сим паскудным сотворѣнем!«

Прибѣгли генералы, але не смѣли приступити до жебрака. Той подивився на них смутными, чорными очими та казав: »Будь заклята, горда царѣвна! Доти блукай по полях и не май нѣгде супокою, доки пташка не нанесе на то поле вышневого зернятка, доки то зернятко не зыйде и не вырасте у велике дерево, и доки не выколышешся дѣтина у колысцѣ из того дерева. Най тота дѣтина высвободить тебе — коли буде мати серце!«

На сѣ слова зник жебрак, але зникла також



царѣвна. Тут-там видѣли сѣ по ночах блукати по полю. Минули часы, забыли за царѣвну.

Ходив раз молодой дѣтвак по тому полю зби-

раючи цвѣты. Як прихилиться до косиць, чує який шум: »Возьми сю квѣточку, освободи мене!« Дивиться, а то змѣйка говорить до него сяк. Напудився хлопчик, лишив змѣйку та побѣг далеко.

Змѣйка бѣгла за ним, та все просила. На конець прибрала на себе людске тѣло, перекинулася у царѣвну и так просила хлопчика: »Высвободи мене, возьми тоту косицю. Лиш ты можеш мене высвободити!

А хлопчик лиш бѣг, та бѣг. Побѣг аж до дому. Не пожаловав царѣвны, бо той хлопчик був без серця.

Вернулася царѣвна опять на свое поле. Там блукає ще до нынѣ, коли не найшла вже дѣтину, яку колысали в той колысцѣ и яка родилася з серцем.



НАРОДНА СПѢВАНКА.

Ой, кувала зазуленька,	А од тогды не кувала,
Кувала, кувала,	Анѣ одну днину,
Од святоѣ недѣленьки	Полетѣла через горы
До святого Йвана.	Та у полонину.

Полетѣла в полонину
Тай тамка кувала,
Сивѣ овцѣ, сивѣ конѣ
Тамка обертала.

(Рахово).

Подав: ИЖАК ШТЕРН
учен. горож. шѣлы.



Малый, малесенький чоловічок.

Жили собі три приятелі: один коваль, другий кравець а третій ловець.

Надумалися они пойти вандровати. Не много мудровали, коваль взяв кліщѣ, кравець ножицѣ, а ловець пушку та рушили в дорогу.

Вандрують, вандрують, раз и заблудили у густом лѣсѣ. Вылѣзе коваль на велике дерево, щобы розглянути, ци не видно дагде дороги. Дороги нѣгде, але недалеко яке то свѣтло свѣтитъ. Рушили всѣ, куды коваль порадив, та найшли ма-



леньку хаточку. А яка то была хаточка! Дверѣ одчиненѣ, в сѣнях в комнатах анѣ душѣ, только лампа горить на столѣ.

»От, се красна хатонька,« — радовалися вандровники. »Дале анѣ не ходѣм. Тут собі пожиеме, доки господарь не вернеся!«

Заквартировались в чистенькой комнатѣ. В коморцѣ найшли свѣжо-печеный хлѣб, ще и солонину, як верета. Їли, пили, добре жили. Ще и закурьовали собі. Бо в хатцѣ нашлося и вина и табаку по достатку.

Та нашѣ вандровники не журилися. Жили собі лучше, як дома. Жили, жили, доки одного рана втямили, що порожня комора.

»Се вже бѣда,« радилися. »Треба самым найти дащо на страву!« Зобралися ловець та коваль, пошли в лѣс на ловы. Кравець остався дома, накла-

ватры, наготовив окроп, щоб все было готове, наколи приятелѣ вернуться з добычею. А як там сидить коло печи, чуе з зад себе який шум. Роздвигнувшись, коло него малый, малесенький чоловѣчок, що ледвы видно его од землѣ. И голосить тоненьким, як нитка голосом:

Кравче, кравче, кравчику! Як задую, тай загашу!

Загасивши, утечу!

»Не говори,« — засмѣявся солодко кравець. А малесенький чоловѣчок только задув, та огонь дораз загас. Погнѣвався кравець, хотѣв ударити малесенького чоловѣчка, алеж его вже нѣгде не было.

Прийшли коваль та ловець з добычею, та ще они вылаяли кравця, що говорить, якѣ то дурницѣ.

Другого дня пошли на ловы кравець та коваль.



Ловець остався дома, та твердо уперся, що он розкаже тому чоловѣчкови. Наготовив все коло печки, та чекав. Не довго! Як май почав огонь розгорюватися, коли зациринкав малесенький чоловѣчок:

Ой, ловцю, ловцю, ловчику! Як задую, загашу!

Загасивши, утечу!

»Та лиш попробуй!« — закричав ловець. Чоловѣчок лиш задув а вже огонь загас а его нѣгде не было.

Прийшли приятелѣ з добычею, а печка студена. Радовався кравець, що от, се ловець так само похотив. Коваль сердито бурмонѣв, а на другий день остався дома он.

Наклав огонь, приготовив воду у горнець, та сѣв собѣ коло печки — але клѣщѣ не выпустив из одноѣ руки. Чекае, чекае а раз одозвеса и до него маленький чоловѣчок:

Ой, ковалю, ковальчику! Як задую, загашу!

Як загашу, утечу —!

Коваль не одповѣв нічого, лиш хопив клѣщѣ та прищип маленького чоловічка прямо за шию. Той не мав часу задутити та огонь загасити. Сяк не мог анѣ утечи.

Айбо анѣ не хотѣв. Бо чуйте таке, в той хвилѣ, як его коваль ухопив мѣж клѣщѣ, перемѣнився малесенький чоловічок у свѣтлого царя — а малесенька хата у блискучу палату.

Было дивованя и радости. Вандровники осталися на вѣки у царской палатѣ, — а ще и нынѣ там живють, коли не вмерли.



Трое братья.

Были раз трое братья, та стали в службу до духа-ворожѣльника. Выслужили три роки, тогды пустив их ворожѣльник та казав: »За вѣрну службу научу вас на чаровнѣ слова. Ты, найстарший, говори все: »Мы трое!« Ты середушный кажи: »За грудку сыра!« А ты наймолодший не забудь: »Так треба!«

Подяковали братья за науку та пошли у дорогу. Як идуть, найдуть при дорозѣ мертвого чоловічка.

Стануть коло него. Прийшли и жандаре, зачали звѣдати: »Кто сего убив?« Каже найстарший: »Мы трое!« Жандаре вызвѣдують дале: »Чому?« »За грудку сыра,« говорить середущий брат. Дивують-ся жандары: »Убили вы такого бѣдного жебрака?« На се одповѣсть третій: »Так треба!«

Завели всѣх трьох до темницѣ, та ледвы могли освободитися. Однакож вдалося им пояснити, що они не розбойники, только чаровнѣ слова хотѣли выпробовати. На се и пустили их из темницѣ. Не треба казати, що по сему нѣколи не мали дяки выпробовати чаровнѣ слова.

Подав: РУДОЛФ ПАВЛИК
ученик горож. школы в Мукачевѣ.

ПОЛОНИНКО.

Полонинко, гордовинко,
То по тобѣ красно,
То по тобѣ полонинко,
Моє стадо пасло.

(В. Апиш)

Подав: ОЛЕКСА ДОБОШ,
ученик нар. школы.



Вечерницѣ на мѣсяци.

Была то бѣдна вдовиця, та была в неѣ дѣчина-красуня. Тота дѣвчина была дуже непослушна. Бывало мати приказуе ци се, ци то зробити. Она на то лиш притакуе: »Так, так, зроблю!« Потом побавиться, погуляе, а за роботу и забуде.»

Было раз, що збиралася дѣвчина на вечерницѣ. А то было правѣ у мясницѣ, перед Великодным постом. Говорить ѣй мати вдовиця: »Моя люба донечко! Не забывай, що завтра вже говѣня. Не дай

Господи, щобы ты смѣла гуляти, спѣвати, танцювати дальше повночи!»

»Добрѣ, добрѣ, мамочко« — говорила дѣвчина — »увидите, когуты ще не запѣють, а я буду вже дома!»

Пошла дѣвчина на вечерницѣ. Зойшлися дѣвчата та парубки. З початку йшла и робота. Потом почалися казочки, спѣванки, забавы. На конец знайшлися якѣ то музыканты. Стали молодѣ до танцѣв. Забыли пост, говѣня. Вже когуты давно одпѣли повноч, коли зобралися, що йдуть до дому. Музыканты йшли за ними, та гуслияли ще и на улици. Мѣсяць свѣтив ясно, як бы свѣтлый день. Стали молодѣ на перехрестю, под кострубатою липою и затанцювали собѣ. Анѣ не подумали спѣшитися до дому.


Вдовиця чекала свою донечку. Та даремно. Тота была перша до забавы и до танцѣв.

Зобралася вдовиця, щобы подивитися, де єѣ дѣвчина дѣлася. Та найшла все товариство гуляючи под липою.

Кажедоньцѣ:
»Ой, ты небоже, непослушна дѣвчино, який тяжкий грѣх паде на твою голову!»

А дѣвчина смѣялася: »Грѣх, не грѣх, доки жиєме, доти гуляєме!»

Ухопив лютой гнѣв матку вдовицю на єѣ слова. Воздыхнула горько: »Ой, бодай ты, непослушна дѣтино, гуляла все при повному мѣсяци и щобы твоему гуляню не было конца!»



Ледва казала се вдовиця, загримало под землею. Непослушна дѣвчина поднялася в мѣсяць.

Там она сидить аж до нынѣ. При повном мѣсяци можете видѣти еѣ. Даколи сидить та пряде а даколи танцюе. Еѣ прядѣню та гуляню не буде конца.



ЩО Я ЛЮБЛЮ?

Над все люблю Всевишнього
и свою родину.

Хатку мою малесеньку
и руську отчину.

Всевишнього Отця люблю
за всю милосердность,
а родичов моих люблю
за их горку чемнѡсть.

Бо нераз мамка родненька
надомнов не спала.

Маленькою дѣтинкою
мене присиплала.

А хатинку зато люблю —
я в нѣй ся родила
и дитячѣ своѣ лѣта
милѡ пережила.

А менѣ є за отчину
миле Подкарпатя,
тут жиють всѣ руськѣ дѣти
подкарпатскѣ братья.

Над все треба всѣм Русинам
Господа любити,
и Ему за руську землю
щиро ся молити!



ВѢНОЧОК

ДЛЯ ПОДКАРПАТСКИХ ДѢТОЧОК.

Выходить каждого мѣсяца як прилога новинки: **»Наш Родный Край.«**

Редактор: **А. Маркуш.** — Предплата Кч 10'— на рок. Поодинокѣ число 1 Кч.

Для школярѣв: на рок 6 Кч, поодинокѣ число 60 геллеров.

..... Адреса: **»Наш Родный Край« Тячево.**

Рочник VIII.

Октябрь 1926.

Число 2.

КОЛОМЫЙКА.

А у мене, молодого,
Такий голосочок,
Як у церкви, на престолѣ
Срѣберный звоночок,

Та кобы мы, товаришу,
Голос спаровали,
Та нашѣ бы голосочки
В полонинѣ стали,

Мы бы собѣ заспѣвали,
Та ще посвистали,
Горѣ селом, долѣ селом
Чорты бы втѣкали.

(Воловецъ.)

Подав: Андрей Баганич.



Дроздобородько.

Была, де не была королѣвна, та была красавицею на цѣлый свѣтъ. Приходили до неѣ, як пчолы на мед, сватачѣ з всѣх краѣв. Але королѣвна, ци не хотѣла отдаватися, ци была горда на свою красоту, доста, що дуже выбирала.

Старый король рад бы був вже передати королѣвство молодому — а королѣвна не держала достойным на се анѣ одного сватача.

Одного дня прийшло опять дась десять сватачѣв-князѣв из далеких краѣв. Вывѣв старый король свою дѣвку, щобы выбирала. А дѣвка, не то, щобы подала руку дакотрому, але зачала их высмѣвати. »Сей высокий до неба, сей товстый, як надутый мѣх.« Сяк дойшли до послѣдного в ряду. А той був красный молодюк з чорныма очима и чорною, як сажа, бородкою. Королѣвна подивилася и казала: »А у сего борода, як у дрозда зъоб!«

Розгнѣвався старый король. Выголосив перед сватачами: що з кары дасть свою дѣвчину замуж до першого жебрака, котрый заблудить у его замок.

Не треба было довго чекати. Ледвы одыйшли сватачѣ, застукав у ворота старый кобзарь и почав выпѣвувати предивнѣ смутнѣ пѣсенки.

Слухав старый король, слухала и королѣвна. Раз лиш ѣмив король за руку свою донечку та и вывѣв до жебрака и казав: »Краснѣ пѣснѣ выпѣвуеш. От, тобѣ подарунок, рука моеѣ донечки!«

Дивовався жебрак, плакала королѣвна, та не было ратунку, король додержав слова.

Ѣмив старый кобзарь за руку свою молодичю-королѣвну, та повѣв еѣ в свою дорогу.


Ишли они день, ишли и два, може и больше. Раз зайшли у великий столѣтний лѣс. Королѣвна запитала: »Чій є сей прекрасный лѣс?« — »Короля Дроздобородька,« одповѣв жебрак. Идутъ дале, выйшли на широку ниву. »Чія ся зелена нива?« запитала опять королѣвна. — »Короля Дроздобородька,« одповѣв жебрак. Зайшли у великий город. Королѣвна вже анѣ не звѣдала, лише заплакала: »И сей город є того короля!« — »Так,« подтвердив жебрак. Плакала королѣвна, жаловала, що одказала такому женихови. А коли увидѣла колыбу, у яку повѣв єѣ жебрак, тогды плакала ще поправдѣ. — »Хоть плач, хоть не плач,« казав жебрак, »вже наша палата сяка. Чому не выбрала ты собѣ лучшу, наприклад Дроздобородькову!«

Та нѣчого было плакати. Що было, минуло. Прийшли горькѣ днѣ на красавицю-королѣвну. Кажє раз рано єѣ чоловік, жебрак: »Ой, невѣстко, не лиш сидѣти а сумовати. Треба дащо заробляти, бо иншак зараз не буде чого поѣсти!« — »Що робити?« дивовалася королѣвна. »От, тут суть гнучкѣ прутя, плети кошики!« говорив жебрак. Почала королѣвна плести, та тверде прутя подрапало єѣ рученята, що кров потекла. Заплакала королѣвна. Увидѣв се чоловік, та кажє: »Но добре, виджу, не тобѣ ся робота. От, тут є клоча, привяжи на кужль, та пряди!« Їмилася королѣвна до сеѣ роботи — та не довго крутила веретеном. Остра нитка зарубала пальцѣ аж до крови.

Одклала королѣвна и сю роботу плачучи. А чоловік ще морконѣв: »Така жона, нѣчого заробити не вмѣє, та ще у сватачах вибирає!«

»Йшло се сяк за один час. Раз выдумав жебрак

нову роботу. »Перебрав я горшки до продажи,«
казав раз. »Выклади на базарѣ. Я буду ходити спѣ-
ваючи, а ты будеш продавати.«



Так и зробили. Розклала жона всѣ горшки:

на торзѣ, та продає. Около неѣ зобралася скоро цѣла товпа. И купцѣ найшлися, бо королѣвна розклала товар не то дагде набоцѣ, ай серед дороги. »Не буде старый жебрак морконѣти,« радовалася вже навперед. Аж ось, лиха година пригнала пяного гусаря. Скочив конь мѣж горшки та розтоптав весь маєток.

Пошла додому сумна королѣвна. Старый жебрак кивнув головою и казав: »Завтра поведу до палаты, може там буде для тебе работа!« Королѣвна ганьбилася принять сяку службу, але ще больше ганьбилася жити без работы, из заробку старого жебрака. Стала другого дня до службы в королѣвской палатѣ. Служницѣ было там як звѣзд на небѣ. На королѣвну не впала така велика работа. Зато была горда, що сама заробляє на себе. Хотѣла похвалитися и старому жебракови, що от, є работа, до якоѣ и она вдатна. Одного полудня запрятала у плат кусочок печенины та бѣленького хлѣба, та побѣгла крадком до колибы жебрака. Отворила дверѣ, и чуйте таке, найшла у колыбѣ Дроздобородьку. Из дивованя упустила плат. Впали на землю хлѣб та печенина. Зачервенѣла королѣвна и од ганьбы заплакала. Але Дроздобородько солодко заговорив, та утѣшав еѣ: »Не ганьбися, та не плач, красна королѣвно! Знай, я був сам тым жебраком, котрый тебе сюды привѣв, я був тым вояком, котрый розбив горшки на торзѣ. Двое з твоим отцем, хотѣли тебе мало покарати — абы ты не выбирала так дуже!«

Зрадовалася на сю бесѣду королѣвна. Одки, одки нѣт, прибив там и старый король, та зробили таке весѣля, що може и нынѣ танцують, коли не

втомилися. На завтра най прийдуть до вас у гостѣ
ци кошики плести, ци мало потанцювати.



ПРОГОВОРКИ.

1.

Каня, каня, завбертаня,
Який отець, така мама!

2.

Спи, дѣтинко, спи,
Очка зажмури,
Бо є у тя мила мати,
Котра спѣвають ти!

3.

Ой, я старый, не могу,
Сѣв ми комарь на ногу!

Подав: Василь Потушняк.



Утѣкайло.

Жив собѣ раз чоловѣк, та мав двох сыноу. Старший звався Неходько, а молодший Утѣкайло. Неходько був дуже лѣнивый, не мав дяки нѣгде ходити, лише сидѣв коло печи и грався в попели. Молодшого сына ледвы мож было дома удержати. Все бѣгав по сусѣдах, за то и назвали его Утѣкайлом. Ще одну привычку мав сей Утѣкайло: не хотѣв боятися нѣкого и нѣчого. Бывало, коли старѣ люде заводили всякѣ казки за нечистѣ духи, Утѣкайло все говорив: »Я бы хотѣв раз видѣти тото нечисте!«

Зговорилися раз люде, що научать его. Одного вечера прийшов до них чужий чоловѣк, та каже: »Но, хлопче, коли хочеш видѣти нечистое, то пой зо мною!« Утѣкайло дораз готов був ити. Повѣв его чужый чоловѣк до цвинтарю и каже: »Сиди туй, доки годинник на вежѣ не буде бити дванацятую годину. Тогды побѣжи и ты на вежу и пробуй ударити у найменший звонок!«

»Добрѣ,« казав Утѣкайло и сѣв собѣ на один гроб. Сидѣв, сидѣв, мало и задримав. Раз чуе, годинник бе и выбе дванацять. Хопився Утѣкайло та бѣжить до церкви и лѣзе до вежѣ. Возьме мотуз малого звонка в руки, тогды втямить, що на малом звонку, щось бѣлое сидить, — каже Утѣкайло: »Кто там? Не йдеш долу, я звонити хочу!« А тото анѣ не кинеся. Розгнѣвався Утѣкайло, коли не хопить нечистое и не кине ним долу ступнями, що мало костки не розбив.

Повѣв тогды чоловѣк додому Утѣкайла, та казав отцеви: »Бери собѣ, чоловѣче, сына, бо той мене мало здоровля не збавив!«

Пройшла слава Утѣкайла по цѣлому селу. Всюды смѣялися, як он трутив нечистым пужалом.

Тогды як раз выдав царь таке письмо, що коли найдесе такий хлоп, що нѣчого не боиться и переночуе двѣ noci в его чорной палатѣ, дасть ему и палату и грошей, колько треба.

Учув се Утѣкайло, та такой утѣк. Зголосився у царя, та зараз помѣстили го в чорной палатѣ. Прийшла ночка. Утѣкайло наклав серед комнаты огонь, та грѣся. Коли настала дванацята година, видить, у него гостѣ, два чорнѣ коты прибѣгли. Один сѣв по правой руцѣ, другой по лѣвой. Узяв хлопец нож и зачав рубати котам пазурѣ, та говорив: »Тѣ, тѣ, якѣ великѣ пазурѣ!« Та все рубает, що одному, що другому. Запѣли когуты, коты пропали.

На другу ноч поклали хлопця в другу комнату. Там вже была и постѣль. Хлопец ляг собѣ та спав спокойно. Около повночи пробудиться. Чує, що постѣль ходить з ним од стѣны, до стѣны. Утѣкайло лежав собѣ дале и казав: »Го, го, го, як ся вожу!« На то зачало то з ним так носити, що мало дверѣ не розломило. Утѣкайло засмѣявся: »Го, го, го, як ся вожу! Пойте и вы туй!« Нато и скочив до него малый хлопчик, чорный и оброслый. Взяв Утѣкайло ножик и зачав бритьвити зарослѣ руки хлопчика, та казав: »Ттѣ, ттѣ, якѣ зарослѣ!« Доти бривтив, та говорив, що запѣв когут а хлопчик пропав.

Прийшли рано царскѣ слуги, та ледвы могли пробудити Утѣкайла, так солодко спав.

Царь додержав слова. Подаровав ему палату, та ще и грошей, колько хотѣв. Од тогды жив собѣ Утѣкайло, як малый царь, больше анѣ не утѣкав.

Коли ще не вмер, найдете его в чорной палатѣ.
Аж вы дуже боязливѣ и вѣрите у всяких нечистых
духах, то пойдѣть до него и запитайтесь его, що
он робив собѣ, абы не боявся.

(В. Бычков)

Подав: Йосиф Смердуль.



ВСѢ В РОБОТѢ.

Павук косив, павук косив
Синичка вбертала,
Комар метав у копиць
Мушка потоптала.
А комар все говорить:
»Будуся женити!«
Заяць змѣтки поплѣтає
Та буде дружбити.
Синичка ся залицяє буде за кухарку,
Мачка хвостом извиває та буде за шинькарку.
Два когуты, два когуты жито змолотили
А двѣ курки, рябужечки у млин поносили.
Баран меле, баран меле,
А цап мѣрки бере,
Котка плеще, котка плеще,
А кот у печ мече.

Подав: Никола Карабин,
ученик гор. шк. Волове.



Тернова квѣточка.

Жили десь король та королѣвна, та вже в их
старых днях уродилася им дѣтина — дѣвчина. Зра-
довалися корольскѣ родичѣ. Скликали на хрестины
кого лиш могли, знакомого и незнакомого. А за
кумы запросили всѣх чародѣйницѣ, якѣ жили в их

державѣ. Сяких было всѣх 13. Прийшли гостѣ, посѣдали за стол. Кумы на передѣ, за ними другѣ гостѣ, знакомѣ и незнакомѣ. Подали всякѣ добрѣ стравы, кому у срѣберных, кому у мѣдяных, кому у скляным тарелках — а кумам чародѣйницам у самых золотых. Але король не мав золотых тарелок только 12 — а кум было 13. Прийшлося покласти перед одну куму только срѣберный тарелок.

По гостинѣ одклонилися гостѣ. Кумы, чародѣйницѣ надѣлили дѣтину чаровными дарами. Перша добродушностею, друга красотою, третя мудростею и так за рядом всѣ. На конци приступила до колыски тота, котрой дали срѣберну тарелку, та казала: »А коли буде тобѣ пятацять лѣт, то вколи перст веретеном, та звалися, як мертва!«

Настрашилися на сѣ дурнѣ слова родичѣ та гостѣ. На то приступила до колыски тринадцата кума та казала: »Але не вми правдивою смертю, только заспи и спи доти, доки не прийде твой королевич, освободитель!«

Розойшлися гостѣ, зникли и чародѣйницѣ. Дѣвчина росла и стала мудрою, красною и доброю, як сѣ кумы зачаровали.

Приходив вже и день, коли королѣвна мала досягнути 15 рок. Старый король, абы не могло сповнитися чарованя злобноѣ чародѣйницѣ, дав розказ на цѣлу державу, що всѣ веретена треба спалити. Так и было. Король спокойно спав и ходив, бо знав, що не є веретена в цѣлой державѣ. Трафилося раз, анѣ короля, анѣ королевы не было дома. Молода королѣвна ходила из комнаты в комнату в королѣвском замку. Сяк вылѣзла онѣ на вежу а там найшла заржавенѣ желѣзнѣ дверѣ. За-

стукала, Дверѣ самѣ отворилися. В малой комнатѣ сидѣла стара бабуса та пряла. Зачудовалася дѣвчина. Она нѣколи не видѣла сякоѣ дивноѣ работы. Попросила бабуся, щобы могла и она спробовати, як то треба чинити. Передала бабуся веретено. А чим доткнулася до него дѣвчина, зараз уколола перстик и повалилася тяжким сном, як бы смерть. А в той хвилѣ замерло все в замку. Заспали кухарьки в кухни, служницѣ в комнатах, конѣ у стайнях. Ще и когут на воротах. Так то заспало все в замку. Около замка зачало заростати колючими тернями. Росли терня, росли, наконецъ не было видно анѣ стѣн замка, только саму гущавину.

Помалы розойшлася вѣстка за терновый замок и за красавицю королѣвну, яка в нѣм спить. Приходили з далеких краѣв молодцѣ щастя пробовати, дѣвчину будити. Та нѣкто не добрався до ворот. Тернова гущавина перестала дорогу — та не пушала нѣкого до замку. Пробовали рубати, палити терня. Мѣсто одного корчаросло десять. Сяк остався замок нерушенный, в самотѣ.

Протекли довгѣ лѣта. Попав раз на сю околицю чужий королевич. Сам не знав, чому йшов сюды. Якбы дащо тягло его. Дойшов до тернового лѣса, та увидѣв найвысшу вежу замка. »То який заклятый замок,« думав собѣ. »Мушу подивитися на него.« Шукав дороги, нѣгде не найшов. Наконецъ забився у тернову гущавину. И от, корчѣ самѣ одступили з его дороги.

Дойшов королевич до ворот. Видить, на них сидить когут, ще и рот роззявив, як бы пѣв. Хотѣв одпудити когута — тогды утямив, що когут не живе.

Пошов дале. В хлѣвѣ стояли конѣ, як бы ка-
меннѣ. В комнатах лежала, ци сидѣла прислуга, та
спали, як мертвѣ. Чудовався королевич, та йшов
все дале и дале. На конци зайшов у послѣдну ком-
нату. На малом стулчику там спала молода дѣвчи-
на. Став королевич. Сякоѣ красоты он ще нѣколи
не видѣв. Приблизився тихенько и поцѣлював бѣле
чоло дѣвчины.



В той хвилѣ ожила дѣвчина, ожив цѣлый за-
мок. І, карьки почали дале мѣшати приправы, скуб-
сти кури, лужницѣ продовжали пѣсню, де лишили,
де и когут зацѣв на воротах.

Щезла тернова гушавина. Прийшли до дому король та королѣвна. И молодой королевич остався в замку. Зробили таке весѣля, що цигане, котрѣ там были, ще и нынѣ сытѣ, так там наѣлися всяким добрым. Коли не вѣруете, позвѣдайте од них.



Дух у фляшцѣ.

Пошов раз бѣдный дроворуб з своим сыном в хашу на роботу. Робили од зорѣ. Коли прийшло полудне, сѣли собѣ под дуб мало одпочинути та з'ѣсти обѣд. Та хлопчище не хотѣв сидѣти. Взяв цѣлый обѣд — кусок хлѣба — до руки, взяв и сокиру, та казав: »Доки нянько одпочинуть, я пройдуся мало в лѣсѣ, може дащо трафиться, ци гриб, ци орѣх!« — »Молодому все по дурному,« морконѣв старый та ляг собѣ одпочивати.


Хлопец пошов и пороздивовався в лѣсѣ. Не дійшов дуже далеко, увидѣв великого дуба, як бы тысячлѣтнього. Став под ним и дивився. Раз лиш чуе який голос: »Освободи мене, освободи мене!« Дивиться сюды, дивиться туды, нѣчого не видить. А опять шепче дакто: »Освободи мене, освободи мене!« — »Та де ты?« закричав хлопец. — »Под дубом,« шептав таємный голос. Подивився хлопец лѣпше, та найшов мѣж корѣнями дуба маленьку фляшочку. Выбере фляшку. Та в нѣй сидить дащо, як бы жаба и шепче: »Высвободи мене, высвободи мене!«

Хлопец не много роздумовав, красно вытягнув затычку. А коли не зачне то дивне из фляшки выходить, та рости. Росло, росло, вже вершок дуба досѣгало. Зробився з малоѣ жабы страшно великий дух, та закричав: »Но, теперь умреш!« — »Молодому дивовався хлопец. »Видав тым подяку,« та що те...

освободив?« — »Тым!« смѣялся дух. »Знай, що

мене, невинного заво-
рожили в сю фляшку,
та я залявса, що то-
го, кто мене освободить,
задушу!«

Роздумава мало хло-
пець, потому казав:
»Добрѣ, добрѣ, коли
то правда, що ты го-
вориш, най буде по
твоему. Але я не вѣ-
рую, що ты вийшов



з сеѣ фляшки. Як бы мог дух, великий як дуб,
залѣзти у сяку малесеньку фляшку!« — »Не вѣ-
руеш? От, я тобѣ покажу!« говорив дух. И зачав
стѣговатися. Тягся, тягся, наконецъ сѣв на дно
скляночки. Хлопець лиш на се чекав, Скоро забив
затычку, та верг склянку опять под дуб.

»Высвободи мене, высвободи мене!« заревав

на се дух. Хлопець лиш смѣявся: »Абы ты мене задусив?« — »Нѣт, подарую тебе щастем и богатством, только высвободи мене!« клявся дух.

Хлопець роздумав та и выпустив его. Дух подержав слово. Подаровав хлопцеви кусок полотна. А то было таке полотно, що коли обтер з ним да-яку рану, то зараз загоилася.

Взяв хлопець полотно и вернулся до отця. Той вже мучився сам. Хлопець як май на то прийшов, коли втнув сокирою, та право у ногу. Заревав дрыворуб и докоряв сынови: »Сему ты винен, лишиш самого одтинати!« — Нѣчого,« казав сын. Взяв полотенце, пообтирав рану. И от, та зараз загоилася. Зрадовався дрыворуб, а ще як радовався, коли дознався, що яке то полотенце.

Хлопець з тым полотенцем походив цѣлый свѣт. Став найславнѣйшим лѣкарем. Може ще и теперъ же дагде, та гоить раны, только нѣкому не зрадить, що то не он, только полотенце має таку силу.



Бородка.

Быв один царь, та мав дванацять лѣсников. Из них каждый мусѣв, каждого дня принести бодай ворону.

Одного разу ходять ловцѣ широкою полянкою. Серед полянки стояв старый черехатый дуб. Псы обстали его и брешуть сердито. Подивилися ловцѣ та вытягли из дупла малого, маленького чоловѣчка, — що была у него борода до колѣн.

Понесли малого бородатого чоловѣчка до царя. Царь запер его в малу скриньочку. Хотѣв похвалитися з ним.

Раз малый царевич закрився в царску комнату. Выбрав малесенького чоловѣчка, Бородку, из скринѣ и почав ним бавитися. Доти бавився, що Бородка раз скочив крозь окно та втѣк.

Заплакав хлопчик та дуже напудився. Просив Бородку, абы вернулся. Бородко говорив ему: »Не

можу, хлопчику, мене дома чекають!» — «А мене мой нянько на смерть засудить,» говорив смутно королевич. — «Не бойся, хлопчику,» казав ему Бородка. Я тобі подарую от сю сопѣлку, коли упадеш у велику бѣду, лиш задуй в нею!»

Прийшли раз гостѣ знанѣ и незнанѣ. Царь запрошував за стол, але гостѣ казали: «Не давай нам гостини, только покажи твого Бородку.»

Вынѣс царь малу скриньочку, отворить — а скриньочка порожня. Смѣялися гостѣ: «Порожнѣ скриньочку мы видѣли вже не одну!»

Розгнѣвався царь — прикличе царѣвну: «Де є Бородка? Скриня лежала в твоѣй комнатѣ!» — Каже царѣвна: «Я не служница од Бородки. Хиба я знаю де он пропав?» Розлютився ще больше царь, розказав розорвати коньми царѣвну. Вже привязали невинну до коней, коли прибѣг хлопчик-царевич та каже: «Не розривай єѣ, я выпустив Бородку!»

«Коли ты був той мудрый. то можеш ити за ним, куды очи ведутъ!» закричав розгнѣванный царь и прогнав своего сына.

Пустився малый царевич в дорогу. Думава, що мѣж добрыми людьми даяк прожие и он. Але царь дав розказ на цѣлу державу, що нѣкто его не смѣе анѣ до себе брати, анѣ поговорати.

Блукав царевич по свѣту и заблукав у густый лѣс. Быв вже дуже змученый. Ляг под дерево и рѣшив, що одси дале анѣ не йде. Одно єму вмерти, думава, ци тут, ци дагде дальше. Як там сумовав, прийшла єму у гадку сопѣлка. Засвистав в нею. И от, тихий лѣс став шумѣти. Приходили и одси, и одти, малѣ, бородатѣ люде. Подхопили слабого царевича и понесли прямо до своего короля, Сидѣв той на блискучом, золотом тронѣ. Царевич зараз познав своего Бородку...

Чому дальше казати. Царевич остався там. нѣколи по сему не вернувся. Коли не умер, то ще и теперъ жиє.

(Волове.)

Подал: Димитро Мышанич,
ученик горож. школы.



ВІСНИК

ДЛЯ ПОДКАРПАТСКИХ ДІТЕЧОК.

Виходить кожного місяця як прилога новинки: **»Наш Родный Край.«**

Редактор: А. Маркуш. — Предплата Кч 10'— на рок. Поодинокое число 1 Кч.

Для школярів: на рок 6 Кч, поодинокое число 60 геллеров.

..... Адреса: **»Наш Родный Край« Тячево.**

Рочник VIII.

Новембер 1926.

Число 3.

Розмова про сонце.

(Й. Кожешек.)

Дітина: Скажи мені мати,
Де йде сонце спати?

Мати: За високу гору,
В золоту комору.

Дітина: А хто йому стелить
На бльой постели?

Мати: Зоронька вечерня,
Красна, як царівня.

Дітина: А хто його колыше
Все тише, та тише?

Мати: Соловей пьснями
Та ночка снами.

Дітина: А якъ сны має,
Коли засыпляє?

Мати: Сняться єму цвѣты,
Що день для них свѣтить.

Дітина: А хто его збудить,
Як свитати буде?

Мати: Божіє ангели
Збудять из постели.

Дітина: А на що, як встане,
Найперте погляне?

Мати: На дѣтей, серденько,
Чи встають раненько.

Из ческого переклала: М. Подіорянка.

(Научѣться сей вѣршик та скажѣть так, що одна буде
говорити мѣсто дітини а друга мѣсто мамки).



Хатчина у лѣсѣ.

Быв, жив дроворуб и мав трьох доньок. Пошов раз у хашу та казав жонѣ: »Зготов, жоно, полуденок та пришли за мною. Най не трачаю я час ходженем сюды и назад!»

Так и было. Зварила жона полуденок та казала найстаршой донцѣ: »Ходи, донько, понеси отцеви обѣд. Взяла дѣвчина горнець та пошла. Ишла, ишла, та не могла найти отця — дроворуба. Доти ходила по лѣсѣ, що и заблудила. Понад вечер дойшла до маленькоѣ хатчины. Дуже зрадовалася: »Слава Богу, запрошуся и переночую тут, а рано добрѣ люде направлять на дорогу!»

Заклопкала на дверцях. Товстый, слабенький голос одозвався: »Заходи, коли твоя дяка!»

Зайшла дѣвчина до хаты. Коло стола сидѣв старый, сивый дѣд. Борода у него мало не до колѣн. А у припѣчку одпочивали: когут, куриця и ряба корова.

Дѣвчинѣ здавалося дивным се товариство. Однакож заговорила: »Дѣдику, старенький, ци не могла бы я от тут переночовати?»

Дѣдо обернувся до своих звѣрят и казав:

»Когутику, мала курько
И коровко ряба,
Ци чуєте, про що мова,
Яка ваша рада?

Звѣрята одозвалися одноголосно: »Най спробує!» На то казав дѣд дѣвчинѣ: »Добрѣ, але в перше маеш зготовити нам вечерю. Ходи, в коморѣ найдеш все, що потрібно!» Зготовила дѣвчина смачну, богату вечерю. Настелила стол, подала вечерю, та и сама сѣла заѣдати, а за звѣрята у припѣчку цѣлком забыла.

Як повечеряли, каже дѣвчина: »А може старенький показав бы ты, що де маю спати, бо я дуже втомилася, блукаючи по лѣсу!«

Старый опять обернувся до своих звѣрят. Тѣ одповѣли:

»Она з тобою вечеряла,
Нас, бѣдных, не пригадала,
Най собѣ йде!«

Старенький покивав сумно головою, та и показав дѣвчинѣ дверѣ. Пошла она заганьблена, та блукала дале в лѣсѣ.

Тым часом повернув до дому дриворуб, та дуже чудовався коли вчув, що его найстарша донька ще и до теперь не прийшла до дому.

Рано, раненько опять пошов дриворуб на роботу и казав: »Пошли теперь страву середною донькою, може она буде щастливѣйша, та ще и сестру найде.

В полудне пошла в лѣс и друга дѣвчина, та походила правѣ так, як еѣ сестра. Забыла за звѣрята и она, та старый дѣд показав и їй дверѣ.

Не вернула додому анѣ друга дѣвчина. Третого дня казав дриворуб: »Най принесе нынѣ обѣд ся найменша!« Жона заплакала: »Де бы пустила сю найменшу, наймилѣйшу, абы и она заблудила кудысь в лѣсѣ!« Але дѣвчина сама одозвалася и просила: »Пусти, мамко, увидиш, я не заблуджу, а може и сестричок поверну!«

На се и пустила еѣ мамка. Заблудила в лѣсѣ и сеся трета дѣвчина. На вечер найшла и она малу хатчину та запросилася на ноч.

Дѣдо опять зазвѣдав од звѣрят:

»Когутику, мала курько,
Та коровко, ряба,

Ци чуєте про що мова,
Яка ваша рада?»

Звѣрята опять казали: »Най пробує!« Заслав дѣд и сю дѣвчину в комору вечерю ладити. Коли вечеря была вже на столѣ, каже старый: »Та сѣдай и ты дѣвчино, вечеряй зо мною!« Дѣвчина на то и говорить: »Зараз, зараз, дѣдику, только погоду сѣлюбѣ звѣрята!«



Занесла коровцѣ мягенькоѣ отавки, когутикови и курочцѣ насыпала чистого зерна, ще и свѣжоѣ воды насыпала у цебрик, Коли звѣрята наѣлися, напилися, тогды сѣла и она за стол.

По вечерѣ каже дѣвчина: »Може час вже и нам лягати спати?«

Старый спитав своѣ звѣрята. Они всѣ разом одповѣли:

»Коли з нами разом Їла,
Як нас красно напоила,
Тож бажаєм: як вна дбала,
Щоб так гарно в ночі спала!«

Показав дѣдо дѣвчинѣ мѣсто у бѣлесенькой постели, а сам ляг собі в припѣчку. Дѣвчина была дуже втомлена, як лягла так и заснула.

Около повночи пробудилася на який гуркот. Дверѣ, окна тряслися, стѣна скрипѣла, а як бы вся хата летѣла. Дѣвчина думала, що то їй все сниться, заспала ще глубше.

Пробудилася онь рано, Пороздивиться, то она є в чужой хатѣ, а ще в блискучой палагѣ. Лежить в шовковой постели, в комнатѣ все золото, ще и топаночки, що стояли коло постели, суть золотѣ. Думала дѣвчина що ще не пробудилася, що ще все снієся їй. Тогды проговорив до неѣ любый, знакомый голос! »Як ты спала дѣвчинонько, ци не боялася в ночі?« Обернеся дѣвчина за голосом дѣда, а то не дѣдо говорить, але молодой, в саме золото убраный парубок.

Дѣвчина не хотѣла вѣровати, що се не сон. А як чудовалася, коли парубок розказав, що он був заклитым королевичем и що его она освободила, бо пожаловала скотину.

Радовалася дѣвчина, доки не прийшли їй у гадку єѣ сестрицѣ. Тогды запитала: »А деж моѣ сестры дѣлися?« Королевич утѣшав: »Не безпокойся, не сумуй. Они ще теперѣ блукають по лѣсѣ, и доти будуть блукати, доки не змягкне их серце и не научаться жаловати голодноѣ скотины. Не журися, на наше весѣля они вернуться!«

Так и было. На весѣлю там были и сестры и мамка и нянько, та ще всѣ свѣтлѣ гостѣ з цѣлого краю. И я там був. Три днѣ їв одну ковбасу, чотыри днѣ меду лизав а потому се вам розказав.



Календарь погоды.

Дѣти купили лист твердого паперу, довгий на один метер и 70 сантиметров широкий.

По серединѣ нарисовали великий прямоуготник. Быв на 70 см довгий и на 50 см широкий. Сей прямоуготник подѣлили на 30 менших прямоуготников и почислили сѣ прямоуготники порядковыми числами.


Над великим прямоуготником написали ще: Мѣсяць сентябрь — а календарь быв готовый.

Та де! Дѣти украсили свой календарь з боков чотырикутника. Нарисовали там всякѣ плоды, листья, якѣ можно найти в осени.

Потому каждого дня записали в одповѣдну клѣточку ци была погода ясна, было хмарно, дощило, абы погода была перемѣнна.

Та записовали се значками. Дощ значила косыми линиями, на погоду осталася клѣточка порожня. Коли было хмарно, клѣточку заповнили водоронѣ линии а перемѣнну погоду значила з скосными линиями до половины заповнена клѣточка.

Першѣ чотыри днѣ выпали сѣк :



Кто скаже, котрого дня яка была погода?

Зробѣть собѣ сѣкий малый календарик и вы, будете мати радостну працю з ним.



Трое пѣрь.

Быв десь король, в старинных часах, коли ще повсюды на земли королѣ пановали. Той король ѣв, пив, нѣчого не робив. Только одну журу мав. Не знав на кого лишати свое царство. Бо было у него трьох сынов — а всѣ однакѣ и добрѣ, и краснѣ и дужѣ — та до нѣякоѣ работы не приученѣ, только до царствованя.

Не хотѣв старый король анѣ одному зробити кривды. Взяв раз до рук трое маленьких пѣрь и казав хлопцам — королевичам. „Кождый из вас пойде у дорогу куды его перце полетить. А котрый принесет менѣ найкрасше полотно, на того лишаю державу.“

Пустив пѣря. Одно полетѣло на сход. Туды пошов найстарший королевич. Друге понѣс вѣтер на запад. За ним пошов середущий королевич. Третье пѣря не довго летѣло, впало у долину недалеко замка. Найменьший королевич пошов за ним, та сѣв собѣ смутно на мѣстѣ, де пѣря впало. Сидѣв там под великою скалою, а як лѣпше пороздивився, утямив у скалѣ желѣзнѣ дверѣ. Захлопав на дверях и чекав. За дверьми одозвався який голос: »Ты найменша и швиденька, подивися кто до нас у гостѣ приходитъ!«

Недовго чекав королевич, дверѣ отворилися, та в них стояло маленьке зелененьке жабеня. Дивовався королевич, а ще больше мав дивоватися, коли в скалѣ найшов свѣтлу палату а в нѣй шестеро жабенят. Королевич не знав до кого звертатися. Стара жаба выпомогла ему и запитала: »А що тебе сюды принесло?« Королевич сказав, в

яком дѣлѣ он ходить. Стара жаба только зашептала дащо найменшой жабочцѣ. Тота побѣгла дагде та вернулася з блискучим полотном, якого королевич ще нѣколи не видѣв.

Вернув королевич скоро до замку и радовался, що буде его держава. Двох братьов найшов вже дома. Бо тѣ не ходили довго по дурному. Видѣли що перце наймолодшого впало под замок, думали, що там он не найде нѣякого полотна.

Так зайшли они до найблизшоѣ жоны, котра полотно ткала и одрубали кусок для короля.



Як зачудовалися и якѣ были сердитѣ, коли найменший повернув з полотном, блискучим, як золото.

Напали на старого короля, щобы зробив ще одну пробу. Пристав старый, бо и ему не было по дяцѣ дати державу найменшому. Казав им: Добрѣ, зробиме ще одну пробу, кто принесет менѣ красивый перстень, того буде цѣле королѣвство!»

Пустив король опять пѣрѣя, та все пошло так, як перший раз.

Молодый королевич зайшов опять до палаты жабенят та стара жаба подала ему перстень з чис-

того золота и блискучим діамантом по серединѣ.

Старшѣ королевичѣ опять не ходили довго. Зайшли до найблизшого склепа, та купили перстенѣ, якѣ найшли.

Вернуться до дому. Малый королевич правѣ тогды передав свой перстень. Розлютились братья. Свого перстенья анѣ не показали. Доти говорили, що наговорили старого короля, абы робити ще одну, послѣдну пробу.

Пристав старый король и на се та казав: »Кто приведе до замку найкрасшу жѣнку — невѣстку, тому и лишу мое королѣвство!«

Розойшли опять королевичи, кождый за своим пѣрем. Молодой зайшов знову до жаб, але сам не вѣрив, що и теперь пощастить ему.

Стара жаба выслухала, що е найновѣйше желаня — и засмѣялася. Подала королеви возок, що був вырубанный з одноѣ крумплѣ и до него было запряжено шестеро мышей. Засмутився королевич: »Я маю жѣнку — невѣстку понести у замок, а не возок а ще сякий!« Жаба лише смѣялася: »От, тобѣ и жѣнка. Выбери собѣ хоть котру з моих доньок, посади на возок, та буде тобѣ жѣнка невѣстка!«

Королевич и гнѣвався и смѣявся. Вхопив найменше жабеня та посадив у возок. В той хвилѣ затрѣщала скала. Возок перемѣнився у золоту карету, мыши в теплокровнѣ конѣ, а жаба в дѣвчину, якоѣ королевич нѣколи не бачив.

Скочив у карету и сам королевич. Жеребцѣ онѣ полетѣли з ними.

И самому старому королеви так полюбилася жона наймолодшого сына, що больше проб не держав, але передав ему цѣле королѣвство.

Ще и нынѣ пануе в нѣм, коли не вмер.



ГОЛОСКУ, ГОЛОСКУ...

Голоску, голоску,
Не дайся змѣнити,
Ци тобѣ не лѣпше
По горах звенѣти.

Не зато спѣваю,
Бо ся добре маю,
Лиш зато спѣваю,
Всю бѣдку збываю.

(Пол. Гута.)

Подав: Юрко Габора,
ученик нар. школы.



Довгими вечерами.

Даколи захочеса отцevi, що дає дѣтям загадки, а тѣ вже навперед знають, що все выгадають. »Яка бочка без обручов и двояке вино є в нѣм?« скаже нянько. »Яйце, яйце,« кричить один против другого. »Но добрѣ, почекайте дале! Сидить пан на даху?« »То є дым!« кричать всѣ, недочекаючи анѣ до конца. »Вы все знаете, так скажу другу: Що не згниє на даху?« Дѣти мовчать — на конци Юрик закричить: »Дѣра!« »Но, уганув!« потвердить отець. Ще дам вам одну загадку, так конець, уважайте: Через сто роков колько раз ступить воробець?« »Йой, йой, кто бы то мог зраховати,« чудуются дѣти. Анѣ не хотять розмышляти, знають що того не выгадають. »Так завтра выйдѣть на двор та почислѣть, колько раз ступив воробець через хвильку але уважай: ступить! помагає отець. »Я вже знаю, я знаю!« подскочить один хлопец радостно. »Анѣ раз. Воробець не ступає, он скаче!«

»Но, коли так добре знаете лущити, заслужите два-три орѣхи,« скаже отець и подѣлитъ им орѣхов.

Божена Немцова.



ПРОГОВОРКА.

Гоп, гоп, кобым хлоп,
Кобым не калѣка,
Кобы в мене только грошей
Як у чоловіка.

(Унѣшово.)

Подав: Иван Иляшко
ученик гор. шк. в Тячовѣ.



Ослик.

Быв собѣ королевич, та дуже гордовитый на свою красу. Бывало, все сидить перед зеркалом, та любуеся своим красным лицом.

Стрѣнув раз сей королевич чаровницю-бабусю, погану на лице, як темна ноч. Только поглянув на нею королевич, та и почав солодко смѣяться, ще и слугам кричав: »От, дивѣть, яка гарна молодиця — борода як у цапа, уха як у осла!«

Бабуся чаровница розлютилася та казала: »Стань ты сам ослом и будь ним доти, доки не пожалує тебе вродлива дѣвчина и не пойде за тебе замуж!«

Зареготався на се королевич и насмѣвковався. Говорив прислузѣ: »Чуйте, якѣ небылицѣ она плете!«

Але прислуга як подивилася на королевича, онѣ духа втратила. На кони сидѣв правдивый осел. И пысок и зубы, ще и уха довгѣ.

Не смѣли нѣчого казати королевичови. Ще и самѣ смѣялися, що бабуся дурницѣ плете.

Як дійшли до дому, королевич, як звичайно, бѣг до зеркала. Загляне, та из зеркала дивиться на него готовый осел.

Засмутився на се королевич, та ганьбився показати себе сякому мѣж людьми, котрѣ знали его красоту.

Взяв торбу на плече и тамбуры в руки, та пошов у свѣт. Абым не забыв сказати, королевич дуже красно умѣв грати на тамбурах.

Блукав королевич по чужих краях, выгравав на тамбурѣ та не мало заробляв. Бо всюды чудовалися, що як то красно грає на тамбурах то дивне сотворѣня.

Вѣсть за тамбураша, ослика дійшла и до палаты жовтого короля. Дав король призвати сего дивного музиканта до себе.

Заграв ослик и королѣвской родинѣ. Та дуже любилася его музика. Найбольше одушевлялася молода королѣвна, бо ослик майже ѣй самой грав.

Прийшов час обѣда, — каже король осликови: »А ты брате, йди, в кухни достанеш обѣд, мѣж слугами!«

Ослик одповѣв: »Дякую за приязнь, але я не звик обѣдати мѣж слугами!«

»Тогды ходи в сѣни та сядь до стола з сторожею!« казала королева. »Дякую, я анѣ до того не звик,« одповѣв ослик.


»Так обѣдай з нами,« силовала королѣвна. Ослик не чекав, абы щераз казали, сѣв за стол та обѣдав ведно з королем та его роудиною.

Так то йшло день, два. Вже цѣлый рок минув а ослик ще все був у королѣвской палатѣ. Не кѣряли его одти а он радо оставався.

Однакож, коли вже и рок минув, подумав на одход. Думав, що не яло так довго гоститися на одном мѣстѣ.

Взяв свою торбу та тамбуры и зайшов до старого короля прощатися.

Старый король так звык уже до ослика, так полюбив его вдачу и его музыку, що анѣ чути не хотѣв о том, абы его пустити. Казав ему: »Оставайся, ослику, проси хоть що од мене. я тобѣ дам, лиш не одходи од нас!«



»Що ты можеш менѣ дати?« зазвѣдав король-евич — ослик и думав на то, що его не може освободити анѣ приязнь, анѣ сила, только доброта якоѣсь дѣвчины.

»Дам тобѣ золото, богатство,« говорив король.
»То для мене нѣчого не варта!« одповѣв ослик.
»Дам тобѣ славу, половину корольвства!« »То менѣ не поможе!« одповѣв ослик и на се.

Думав, думав король, чим бы привязати до себе ослика. Тогда заглянула до отця и королѣвна. Король з половины на жарт, з половины поправдѣ сказав: »Дам тобѣ доньку за жону!«

Ослик подивився на королѣвну, та казав смутно: »Колиб она мене пожаловала то бы помогло!«

Королѣвна мала дуже добре серце, та ослик и їй дуже любився. Дащо їй шептало, абы при-стала.

Дальше анѣ не кажу! Было весѣля, але яке радостне. Бо ослик в той хвилѣ, як королѣвна по-божилася з ним, достав назад свою давню подобу.

Та и не было на свѣтѣ красшоѣ пары, як он та его молода.

Я их не видѣв, але чув од качура. Качурови кухарь казав, котрый гостину готовив. Там був, видѣв и все знав.

Коли не вѣрите, позвѣдайте од бѣлого качурика.



СПѢВАНКА.

У недѣлю, свадьба буде,

Комар мушку сватать буде; раз.

Он до неѣ завѣщався,

Горьлочков повѣщався; пють.


Она єму не звѣрила,
На острочку привязала; стой.
Он з рострочки одорвався,
На зеленый дуб попався; стѣв.

Изнялася шуря буря,
Комарика з дуба здула; впав.
Упав комар, тай не дыше,
Ручков, ручков не колыше; вмер.

Изыйшлися старѣ мухи,
Взяли єго попод руки; йдуть.
Изыйшлися старѣ осы,
Заплѣтають єму косы; два.

(Н.-Шард.)

Записав: Ю. Станинець.



Два браты.

Дуже далеко, десь за горами, за лѣсами, жили два браты. Один був дуже богатый, а другий не мав нѣчого, только одного, але дуже красного когута.

Богач був дуже заздростливый. Одного разу пошов бѣдный на роботу. Богач прийшов гордо до єго жоны и почав кричати, абы зарѣзала когута, бо так пѣе що спати не дає. Коли бѣдный вернувся з роботи, жона все розказала єму. »Но добре — сказав он — зарѣж когута, та пойду до панов, та продаме. Мы тым и так не наѣмось, коби сухой хлѣб, не ще и мясо.« Так и зробили. Понѣс бѣдный чоловѣк когута до пана. Пан зачудовався, що такий бѣдный чоловѣк та має когута на продаж. Коли бѣдняк сказав причину, пан запросив єго на обѣд. Абы хоть покушав дащо з когута. При обѣдѣ засиловав пан чоловѣка роздѣлити когута на сѣм

части справедливо. Бо сидѣли коло стола семеро: двѣ доньки, два сыны, пан з жоною, а бѣдняк семей. Чоловѣк думав, думав потом взяв когута тай каже: »Пану, яко головѣ, владицѣ сего дому, приходиться голова. За ними має их жона найбільшу власть, за то им шия. Крыла даме их донькам, бо они не задовго одлетять од них, оддадутся. Сынам по нозѣ, бо то, як бы панови ноги при господарствѣ. Но а тулуб останеся менѣ«. »Дуже добре,« похвалив пан. Завтра рано прийдеши до мене, та поведу тя в поле на мою землю, та выбереш собѣ 10 кобловок.

Пошов чоловѣк до дому, айбо такой радый, що не мѣститися в кожи. Другий день дуже рано встав и проходжуеся перед панским двором, бо з радости не годен був и спати. Увидѣв то его брат, тай пошов зазвѣдатися, чому так рано встав. Коли вчув, що сталося, побѣг до дому и приказав жонѣ, щобы всѣх 5 когутів зарѣзала. Понѣс богач когуты до пана, надѣявся достати цѣлый хутар за них.

Пан запросив и сього на обѣд. При обѣдѣ пан засиловав 5 когутів роздѣлити на 7 ровных частей. Богач думав, думав, тай нѣяк не брався до работы: Тодѣ пан каже до бѣдного, що стояв у закутѣ: »Ану роздѣли ты, та достанеш нагороду.« Тодѣ бѣдный не нагадуючися каже: »Пан и их панѣя — тото 2. та один когут тото разом 3. Их два сыны, та один когут и то трое?« »Добре«, сказав пан примахуючи головою. »Их 2 доньки и один когут и є то 3.« »Дуже добре.« »Но а тут туй ще остались два когуты. Так?« »Так,« но а я третий и всѣ маємо однако. »Славно, дуже добре,« закричав пан. Так бѣдный достав ще и за братовѣ когуты землю.

(Нижній Шард.)

Записав: Ю. Станинець.





Виходить кожного місяця як прилога, новинки: **«Наш Родний Край.»**

Редактор: А. Маркуш. — Предплата Кч 10' — на 'рок. Поодинокое число 1 Кч.

Для школярів: на рок 6 Кч, поодинокое число 60 геллеров.

..... Адреса: **«Наш Родний Край» Тячево.**

Рочник VIII.

Децимбер 1926.

Число 4.

ОЙ, ДУБЕ ЗЕЛЕНЕНЬКИЙ...!

(Народна.)

Ой, дубе зелененький
Чоюсь нерозцвився?
Зима была студененька,
Я заморозився.

Зима была студененька,
Льто холоденьке,
Та тому я не розпустив
Листя зелененьке.

Ще до того вороженьки
Стовпы поломили,
Щоббы лекше спати было,
Под себе стелили.

(Берегово.)

Записав: Горват Евген
уч. гимназії.



Чудотворнѣ гуслѣ.

Служив у мельника — чаровника парубок, та быв дуже вѣрным слугою. Всю свою роботу точно докончив, нѣколи не ледачив, нѣколи не звѣдав, що має робити. А до того анѣ платнѣ не просив. Минув рок, минув другий, минув и третей. Тогды пошов слуга до газды та казав: »Пане, газдо, три роки у вас честно, выслужив я, грошей нѣколи не просив. Выдайте теперъ мою нагороду, бо я хочу вже рушити дале, щастя пробовати, друге ремесло познавати!«

Мелник чаровник зажурився и казав: »Шкода за тебе, такого слугу скоро не найду! Служив ты честно три роки, грошей не просив, отже дам я тобѣ в нагороду сѣ гуслѣ. Будуть они тобѣ больше варта, як грошѣ. Коли на них заграєш, чудеса увидиш и всѣ твоѣ желаня заповняться!«

Взяв слуга гуслѣ. Красно одклонився та рушив в дорогу. Иде, иде, раз у густом лѣсѣ перестане его дакто«. Куды ты хлопче, парубче — бѣлый мельнику?« Куды очи видять, одповѣсть парубок. »Зараз будеш ты говорити смиреннѣйше!« смѣявся чужий. »Давай всѣ грошѣ, що при собѣ маєш!«

Мельник уганув, що має дѣло з розбойником, але не напудився. »Грошей не маю, але коли дозволиш заграю тобѣ одну писеньку! казав, та и почав грати на гусях. Та чуйте диво! Як не зачне на ту музику танцювати розбойник, танцював час, танцював два, вже ледва дыхав. Мелник ще грав на гусях. »Перестань вже грати! Дам тобѣ мѣшок золота, лишень перестань!« — просив розбойник.

Взяв мельник мѣшок золота, та лишив розбойника замореного, сам пошов дале на свою дорогу.

Але розбойник дуже розлютився за сю науку, та дуже жаловав и мѣшок золота. Подумав одобрати назад обманством. Убрався в красну паньску одежу, та побѣг у великий город, через котрый вела



дорога мельника. Побѣг просто до судіѣ и заголовив, що од него, честного торговця, такий а такий мельник — вандровник украв мѣшок золота.

Выслав судія своих слуг, тотѣ и ухопили мель-

ника чим ступив у ворота города. Много не звѣдали понесли просто до судіѣ. Дармо божився мельник, що он невинен, що то золото ему даровав один розбойник в лѣсѣ. Судія не вѣровав ему. Ще и смѣявся: »Якѣ дурницѣ плетеш, розбойники золото одбирають а не даруютъ!«

А що мельник дуже настоював на своѣм, розлютився судія и засудив его на шибеницю.

Прийшли каты поставили шибеницю. Збѣглося громада людей, абы дивитися. Там був и судія и пан — честный торговецъ. Коли подвели хлопця под шибеницю, той обернувся до судіѣ: »Дозволѣть менѣ пане судіе, абы щераз заграва на гуслях!«

Честный торговецъ почав кричати: »Не дозволять ему, лиш того не дозволять!« Але судія дозволив, бо се былъ звычай сповняти послѣднѣ желаня засужденыхъ.

Почав хлопецъ грати, та коли не пустилася в танецъ цѣла товпа.

И судія и слуги и честный торговецъ. Ще и кат танцював на лазивѣ.

Мельник доти грав, доки »честный торговецъ« не признався, як то случилось поправдѣ в лѣсѣ.

Тогды перестав грати и красно злѣз по лазивѣ, та и пошов собѣ.

Що честного торговця зараз ухопили и завязнили и покарали, як того заслужив то вже можно думати.



БАРАН И ПАН.

Ишов баран мостом
Трясуци хвостом.
Де ты идеш, баране?
До Парижа, мой пане.
Що там чути, баране?
Гудуть красно, мой пане.
Грати было, баране!
Ньгде было, мой пане.
Серед хижь, баране!
Довть рош, мой пане.
Зтяти было, баране!
Болъли бы, мой пане.
Мастити бы, баране!
Нъчим было, мой пане.
Коломастью, баране!
Мастися сам, мой пане.

Подав: Иванчов Федор,
ученикъ горож. школы в Бѣлках



Горня слез.

Была десь вдовиця та не мала нѣкого на свѣтѣ
окрем одноѣ малесенькоѣ дѣвчины. Ся дѣвчина
была дуже красною а мала сердце, як голубчик. Не
диво, що мати любила еѣ понад все.

И от, раз напала заразлива хворота на их село.
Вмирали люде, як мухи в осени. Достала сю хво-
роту и мала дѣвчина, та и не выдержала. Одного
вечера заспала на вѣки, одойшла в далеку, далеку
краѣ, стала свѣтлою зорницею, блискучим ангелом
на небѣ.

Огорнула бѣдну матѣрь тяжка, невымовна боль. Она не ѣла, не пила, только плакала день и ноч.

Бывало возьме до руки бѣлу сорочечку, червону шириночку, що дѣвчинка их залишила, та плаче и плаче.

Дарьмо просили сусѣды, дарьмо приходили утѣшати, бѣдна вдова не могла забытьи анѣ на хвильку своеѣ дорогоѣ дѣвчины. А як пригадала, то и зараз полилися слезы из очей.

Одного вечера выбрала вдова всѣ забавки, куклы, малу колысочку, кукольнѣ одежѣ, що остались од донечки, дивилася на них та и рыдала тяжко.

Люде в селѣ вже полѣгали спати. Закрыла село тиха, темна ноч. Бѣдна вдова лиш сидѣла собѣ серед хаты, дивилася на дорогѣ рѣчи, якими даколи еѣ дѣвчина бавилася, та плакала.

И от, раз дакто заклопкає, отворяться дверѣ и заступить до хаты малый ангелик. Вдова зараз



спознала, що то еѣ дѣвчина. Захопила еѣ невымовна радость. Хотѣла пригорнути свою дѣвчину до сердца, але та стала смутно у дверях та казала: »Не зато прийшла я, абы тут осталася! Прийшла

я показати тобѣ ось сей горнець. Дивися, до него збираю я всѣ твоѣ слезы. И доти не буду мати супокою на том свѣтѣ, доки ты не перестанеш плакати за мною. Доти мушу все сторожити, абы анѣ одна капля слез не пропала. Як любиш мене, и хочеш, абы мала я супокой, то прошу тебе, перестань плакати!»

Скочила вдова, абы хоть ще раз поцѣловати свою дѣвчину. В дверях вже не было нѣкого.

Воздыхнула вдова тяжко. Одоклала всѣ забавы. Од тогды перестала плакати.



Як гостився циганин в царствѣ.

Коли Христа напинали на хрест дали вояки зробити пять гвоздов: два на руки, два на ноги, а один для головы. Але циганин — коваль зробив только чотыри, пятого для головы не зробив.

Стрѣтив раз посему Христос того циганина и звѣдує: »Що тобѣ дати за твою добросердечность до мене?»

Думає циганин, думає, на конецъ говорить: »Дай менѣ таку тайстрину, що лиш крикну, та залѣзе в нею, хоть як великий пан!»

Христос зробив, як он собѣ желав. Пошов циганин до дому з тайстриною, та вже з далеку чує, що в его майстерни дакто майструє. Подивиться, а то там сам Луцифер, головный з чортов. Крикнув циганин, а Луцифер в той хвилѣ залѣз в тайстру. Ухопив циганин клѣщѣ та клепач, доти бив та щипав Луцифера, доки не пообѣцяз, що нѣколи его до пекла не возьме.

Жив собѣ по сему циганин, як хотѣв, бо быв певный, що до пекла не пойде. Дожив свой час, та вмер. Але на другий свѣт понѣс з собою також тайстрину. Ишов просто до ворот царства. Алеж св. Петро там стояв та не допустив. »Такѣ грѣшники, як ты, тут не мають мѣста!« — говорив. — »А де маю ити« — звѣдав циганин. Хоть и до пекла« — казав сердито св. Петро, та сунув воротами. Пошов циганин до пекла. Луцифер як учув, ктр до него просится, лиш только звѣдав: »Ци має тайстрину!« Коли сказали слуги що має, то всѣ дверѣ, окна позапирав, абы циганин не мог анѣ заглянути до пекла.

Вернувся циганин опять до св. Петра, та каже ему: »Запусти мене хоть у кутик, позад дверьми!« Алеж св. Петро не приставав, ухопив тогды циганин свою шапку та заверг до царства и каже: »Запусти, только шапку пошукаю та и выйду!« Св. Петро не мог лишити ворота, запустив циганина. А той ухопив шапку та сѣв на нею кажучи: »Теперь менѣ не розказуеш, бо я на своѣм сиджу!« Алеж св. Петро не вытерпѣв сякоѣ безочливости, почав циганина тручати вон. Всердився циганин, только крикнув, а св. Петро был уже в тайстринѣ. Циганин став мѣсто него ворота сторожити. Та запускав всѣх, котрѣ лиш приголосилися. Утямив Христос, що до царства набилось всяких грѣшников. Пошов до ворот а там циганин сторожить, а св. Петро у тайстрѣ сидить.

Погнѣвався Христос. Высвободив св. Петра, та розказав циганинови самому сѣсти у тайстрину.

Св. Петро завѣсив тайстру з циганином на гвоздѣ на воротах царства та ще и теперь там он висить, коли Луцифер не прияв его вже до пекла.

(Воловецъ.)

Подав: Андрей Батанич.



ОЙ, Я ПОЙДУ.

Ой, я пойду в полонину,
 Тай у тоту гуцу,
 Та я там ся зарубаю,
 Нького не пушу.

(Буковець.)

Подав: Н. Щербей,
 ученик гимн. в Ужгородѣ.

Як вырѣзовали мы коней.

Моя сестра, Иляна, стала вырѣзовати коней из папѣря. Мы прилѣплювали их на скла и поставили в окно.

В святах дѣти прохожующися туды, навѣть и старѣ люде, стали под нашими окнами и дивилися на нашу роботу.

Я приучився скоро вырѣзовати. Начиная од копыта задньоѣ ноги и вырѣзовав всего коня: лишив папѣрь для головы и хвоста. Потому красно розрѣзовав и заокругляв хвост и гривы.

Иляна умѣла вже вырѣзовати и людей: дѣвчины, хлопчики, бабы в петеках. То все повывкладовали мы в окно. Кто лиш ходив коло нас, подивився и смѣявся. Пальцами показовали на нашѣ окна и смѣялися.

Мы тоже хохотали и выкладовали все новых та новых вырѣзок.

(Ци звывкли вы вырѣзовати з папѣря? Попросѣть вашого п. учителя, абы вам показав, як треба се робити. Потому вырѣзуйте скоты, рѣчи и т. д. в яких учитесь в школѣ.)



Дарунки гномов.

Золотарь и кравець ходили свѣтами. Одного вечера, як лягли одпочинути в темной гущавинѣ, вчули яку то чудесну музыку. Бо обое были веселоѣ вдачѣ, подхопилися и ишли шукати, де то гуляють в сѣй гущавинѣ. За голосом музыки дойшли до ясноѣ полянки и онѣ замлѣли од дива. Серед полянки сидѣв малесенький дѣд. Борода у него до колѣн и бѣла як снѣг, та выгравав чудесну музыку. Около него в широком кружѣ танцювали дробнѣ, дробнесенькѣ гномы, кождый з своєю парою.

Стали золотарь и кравець чудоватися, и боятися забыли. Раз лиш утямив их малесенький музикант, та махнув им, абы зайшли в круг до него. Золотарь був смѣливый чоловік та послушав. Кравець боявся як заяць, однако ганьбився остатися позаду. Перейшли обое через круг танцюючих и стали коло дѣда музиканта. Не довго мали стояти. Прибѣгли дробненькѣ гномы, звалили з ног, а дѣдо музикант взяв острый брыч, та обголив им голову. Анѣ одного волоса не лишив.

Можете думати, як трясся кравець, коли дѣд-музикант острив брыч и гладив ним его голову и лице. Коли были обголенѣ, казав им дѣд-музикант: »От, тут коло мене лежить громада угля, наповнѣть из него своѣ кешенѣ, най буде вам на дорогу!«

Золотарь и кравець не смѣли противитися, набрали честно з угля, хотяй не знали, для чого они его спотребують.

По сему пустив их дѣд-музикант. Они одойшли. Од великого страху были так утомленѣ, що незадовго заспали под одним деревом.

Пробудяться рано, Дивляться один на другого. У них выросло волоса ще красше, ще густѣйше, як было. Сягають до кешень, а там повно блискучого золота.

Зрадовалися подорожнѣ товаришѣ, почали пораховувати скарб, яким подаровали их гномы.



»Дали нам доста, выстарчає на цѣлый жнвот, ще и на церков останеся!« казав довольно кравець. — »Що, выстарчає? — одозвався золотарь. — »Мы остатнѣ дурнѣ, могли напхати и торбину а мы поклали только в кешенѣ!«

Кравець лиш смѣяв-

ся. Он быв довольный. Не так золотарь. Сей быв дуже скупый и нажерливый. Коли мав мало, хотѣв мати много. Як достав много, жадав ще больше. Доти журился, та мудровав, що прийшов вечер. Тогды взяв на плече торбу, ще и од кравця позы-

чив, та рушив глядати ще раз дѣда-музиканта, котрый острым брычем гладить и углем-золотом платить.

Кравецъ не рушився из мѣста. »Менѣ сего доста, больше анѣ не треба,« казав довольного.

Пошов золотарь та походив право так, як попереднього вечера. Дѣд-музикант взяв брыч, выострив, та обголив тверду голову нажерливого золотаря. Потому показав на купку угля. Золотарь лиш сего чекав. Напхав обѣ торбины, напхав всѣ кешенѣ, ще и пазухи набив. Гномики стояли около него, смѣялися та нукали, абы лиш брав.

Набрав золотарь только угля, що ледвы мог одтягнутися до дуба, де его товариш кравецъ чекав. Там лиш упав на землю та и заснув.

На зорѣ скоро пробудиться, волосем анѣ не твориться только спѣшитъ золото выбирати. Та походив. Угля осталось углем. Розтрощилося у кешенях, у торбинах, розлѣзло в пазусѣ, заласкудило, замазало одежу и тѣло. Се не лоста, ще и то золото, що мав з попереднього дня, перемѣнилось опять в угля. Можете думати, як лютився, як журився нажерливый золотарь, що гномы сяк показали его.

Однакож успокоився. Бо его товариш-кравецъ мав таке добре сердце, що подѣлив з ним свое золото — и од тогды обое жили в миру и в щастю.



ПРОГОВОРКИ.

Гоп, гоп, гоп,
Играла бы дѣвка,
Дѣвка бы не играла,
Кобы не горьвка.

(Урмезіово)

Ой, ишов я горѣ селом,
Та найшов я пѣльник,
Выпадали на мя люде,
Що я ворожьгельник.

Подав: Андрій Куцин
ученик нар школы

Прощо у воробка шия чорна.

(З бенганлского.)

Гдесъ раз быв один воробок, котрый жив щастливо и спокойно з своею жоною и дѣтьми.

Одного разу выбух в его гнѣздѣ огонь. Старый воробок смутно лѣтав коло гнѣзда од великого страху спершу не знав до чого ѣмитися. Воробчиха спокойно вылетѣла з гнѣзда, сѣла собѣ на другій конарь, о мадых воробках цѣлком не старалася. Коли сесе увидѣв воробок, одважився, же дѣти спасе од погибели, або и сам погине. Влетѣв до поломени и одно за другим выносив их з огня вон. Коли хапав послѣдное, котре было найменшое и сидѣло в гнѣздѣ глубоко, одпалив собѣ шию.

Од того часу мае самецъ на шиѣ чорну цятку.

Подал: В. Довгун.



Трое пѣрь.

Жив раз бѣдный чоловѣк, та вродився у него сыночок. Выйшов бѣдняк на дорогу глядати кума. Стрѣнув малу, гарненьку дѣтину, та и запросив еѣ до себе. Приняла дѣтина сю велику почесть. Коли хрестины минули одпрощалася и казала: »Не можу дати теперъ нѣякого подарунку, але наколи мой хрестный сын досягне 20-ый рок, дарунок сам прийде на двор!«



Минули часы. Хлопецъ красно рос. Одного вечера каже отцеву:» Няньку, завтра заповню 19

рок. Час, абы не сидѣв далє в припѣчку, але пошов у свѣт, щастя пробовати!»

Старый пригадав собѣ слова кума, та нѣчого не казав. Рано сын поправдѣ зобрав свою мерендю и одпрощався од родичѣв, Случилося так, що як переступив порог хатчины, в той хвилѣ досягнув 20 рок. И от прибѣг до двора блискучий жеребець став перед хлопцем и промовив людским голосом: »Сѣдай на мене я тебе понесу, куды твое щастя лежить!» Зачудовався парубок, але отець розказав єму, як то говорив его батечко на хрестинах.

»То вже инше!» успокоився хлопець. Сѣв на коня та и полетѣли.

Летѣв конь, летѣв. Лишили свѣтлѣ города, золотѣ нивы, шовковѣ луги. Хлопець всюды звѣдав: »Ба ци тут мое щастя лежить?» Конь все одповѣв: »Нѣт!»

Раз як идуть в густом лѣсѣ, увидить парубок на дорозѣ перце, але блискуче як золото. »Ой, як добре буде его покласти за ковпак« — подумав и хотѣв скочити з коня, абы подняти его. Конь заговорив: »Лиши то перце, оно не доста для тебе!» Роздумовав хлопець, що то можуть значити сѣ дивнѣ слова. Не мог уганути, але перце лишив на дорозѣ.

Йшли опять довгѣ днѣ. Раз на березѣ широкоѣ рѣки увидѣв хлопець опять одно перо. Але се было вже свѣтлѣйше сонця. Скочив з коня, абы его подняти. А конь опять промовив: »Лиши то перце, оно не доста для тебе!»

Хлопець подивився на перо, та хоть оно дуже тягло его — не подняв, послухав коня.

Вандровали опять далє. Через нѣсколько днѣв

на порозѣ у воротах близкучого замка втямив хлопоць опять одно перце. То было вже таке свѣтле, що дивитися на него не мож было.

Парубка онь тягнуло до пера. Однакож побѣдив свою жадобу и запитав раз од коня: »А се ци для мене?«

Конь одповѣв: »Так, се є для тебе, скоч та и подойми его!« Послухав парубок. Подняв перце и поклав за шапку. Не встиг сѣсти на коня, коли вже отворилися ворота замка. Из замка выйшла товпа людей одягнутых о блискучѣ золотѣ одежѣ и стали привитати парубка: »Славен будь наш королю, слава тобѣ, кого всемогущий нам прислав!«

Парубок не много мудровав. Коли вже так дуже хотѣли сѣ всякѣ паны, та поправдѣ став у них королем. »Є се легша робота, як дома дрыва рубати« — думав собѣ. Та ще и нынѣ панує, коли не науѣла ему ще ся робота — и не полакомився на тихий живот в селѣ. Коли вернєся раз опять под соломяну стрѣху, позвѣдайте од него, чому залишив королѣвство.



Одки происходит табак.

Была, де не была раз безбожна жона. Та взяла в голову, що она є пресвята божа матѣрь.

Зачала всюда проповѣдати своѣ безбожнѣ науки. Раз зайшла и до церкви право на казательницю и одти проповѣдала людям.

Люде не знали, ци вѣрити ѣй, ци нѣт. Почали молитиси до Бога, абы дав знак ци правду говорить ся жона, або нѣт.

Бог выслунав их молитву, як вийшли з церкви, жона розпалася на дробненькѣ крышки. Сѣ крышки розсѣялися и затопталися в землю. На веснѣ сѣ крышки посходили и выросли из них великѣ листья.

Люде, щобы не остався знак безбожноѣ жоны, почали сѣ листья палити и курити ними. Сяк приучилися до курѣня. Бо сѣ листья были табаковѣ.

Иван Бигун,

ученик гимназіѣ в Хустѣ.



КОЛОМЫЙКА.

Теперь я ще молоденький,
Та кобы я вырос,
Я бы мамцѣ дрывець утяв,
Тай водички занѣс.

А я гадав, що виросту,
Та пойду косити,
А вни взяли у катуны,
Карабин носити.

(Рахово.)

Подав: М. Слюсарчук,
ученик гор. школы.





ВІСНИК

ДЛЯ ПОДКАРПАТСКИХ ДІТЕЧОК.

Выходить кожного мѣсяця як прилога новинки: **»Наш Родный Край.»**

Редактор: А. Маркуш. — Предплата Кч 10— на рок. Поодинокє число 1 Кч.

Для школярѣвъ: на рок 6 Кч, поодинокє число 60 геллеров.

..... Адреса: **»Наш Родный Край« Тячево.**

Рочник VIII.

Януар 1927.

Число 5.

КОЛЯДА.

(Хлопцеві).

Пошов Иванко гуслѣ рубати,*)
Гуслѣ не рубав, пальчик порубав.
Приїде татонько пальчик завити,
Пальчик не завив, та ще уразив.
Приїде мамонька пальчик завити,
Пальчик не вила, та ще вразила.
Приїшов братонько пальчик завити,
Пальчик не завив, ще лѣпше вразив.
Приїшла сестриця пальчик завити,
Пальчик не вила, лем уразила.
Приїшла миленька пальчик завити,
Пальчик завила, тай не вразила.
Лѣпша миленька, як мамка родна,
Як мамка родна, отець родненький,
Отець родненький, брат дорогенький,
Брат дорогенький, сестра родненька,
Лѣпша миленька, як мамка родна.

(Воловець)

Подав: Андрій Баганич

*) За кождою строчкою приспѣвъ: **»Жовтая яла, як красно граю,
жовтая!«**

Вифлеемская игра

в двух дѣях.

Особы: Старый овчарь, I, II, III, IV. овчарь, ангел, Марія, Йосиф, ангелы.

Полянка, окружена смереками, в серединѣ ватра. Овчарѣ приходятъ.

I. ДѢЯ.

Старый овчарь: Ци заперли вы всѣ овцѣ до кошары?

Всѣ: Де бы не заперли! Ще и соломы настелили под ними, абы не ззябли на сей день.

Старый овчарь: Тогды сѣдайте и мы та грѣмесе и повечеряеме!

Всѣ: И мы на се думали! Только чекали на вас! (Сѣдаютъ около ватры и ѣдятъ).

I. овчарь: Студено буде в ночи.

II. Овчарь: Може ще и снѣгу нападе.

III. Овчарь: Покладу ще хворосту на ватру, абы грѣла читаво.

Всѣ: Клади, клади!

IV. Овчарь: Що нового чути в городѣ, старый?

I. Овчарь: Бы теперъ из Вифлеема, а нам нѣчого не кажете! Що там чувати, яка є новина?

Старый ов.: Новины не є. Лише дуже много народа зобралося в Вифлеемѣ. Ледвы може чоловік на улицах ходити.

II. Овчарь: А чому? Може ярмарок є?

Старый о.: То нѣт! Як говорятъ, чѣсарь дав выбубновати, що кождый чоловік має голоситися у селѣ, де народився. За се зойшлося так много людей в Вифлеемѣ.

III. Овчарь: А що хоче з ними чѣсарь?

Старый овчарь: Люде кажутъ, що хоче

знати, колько душ жие в державѣ, кольким он розказуе.

IV. Овчарь: Ага, то списують людей!

I. Овчарь: А кто не голоситься, що буде из тым?

Старый о.: Так чув я, що на того чекае дуже строга кара!

II. Овчарь: Тогды майже и нам бы пойти.

Старый о.: Так е, завтра мусиме пойти.

III. Овчарь: А ще дащо не чули?

Старый: Тадь чув — але сам не вѣрую. Говорять, що нынѣ мае народитися Мессія, за котрого пророки говорятъ.

I. Овчарь: А де?

Старый: Кажуть, що в Вифлеемѣ!

Всѣ: То вже не вѣруеме. Абы в таком убогом селѣ! А, лѣгаиме спати. Завтра пойдеме записатися. (Лѣгають и заснуть. Межи смереками явиться свѣтлый ангел).

Всѣ: (Пробудяться) Що то, що то, що е то?

Ангел: Не бойтеся! Я чиста душа. Вставайте овчарѣ! В Вифлеемѣ новина, чистая дѣва народила сына. Идѣт в Вифлеем, там найдете в яслях пеленами закрыто Месію, кого люде ждали!

Старый: А де его найдеме?

Ангел: Идѣт за тою красною звѣздою.

Всѣ: То е дивно. (Стають и спѣвають): »Дивная новина (Концем спѣву ангел зникне).

Старый: Коли се правда, то великоѣ радости дождалися мы.

Овчарѣ: Ходѣм, подивѣмся. Ось ясна звѣзда, як кличе нас.

Всѣ: Ходѣм, ходѣм.

Старый: Але не можеме йти порожними руками. Маленькому Иусу маеме понести даякий дарунок. Що ему понесеме?

I. овчарь: Я понесу малу кучеряву овечку.

II. Овчарь: Я оддам мою сопѣлку.

III. Овчарь: Я понесу масла.

IV. Овчарь: Я несу кожушок и закрью его, абы не замерз.

Старый: Тогды ходѣм витати новорожденного Одкупителя Иуса Христа!

I. Овчарь: А на дорозѣ заспѣвайме.

Всѣ: Спѣвайме, спѣвайме. (Спѣваючи одходять)
»Радость нам ся являє.«

(Заслона).

II. ДѢЯ.

Живый образ.

Вифлеемска стайня. Йосиф, Марія, Иус и ангелы. Пастырѣ приходять спѣваючи, перед яслями клякають и молятся.

Старый: О, Иусе наш малый товариш,

Бери сердечно нашѣ дарунки.

Презри на нас милосердно,

На всякий час поможи.

I. Овчарь: Я даю кучеряву овечку (и покладе овечку до ног Иуса).

II. Овчарь: Я даю сопѣлку.

III. Овчарь: Я даю масло.

IV. Овчарь: Я даю кожушок.

(Поклавши подарунки, зачинають спѣвати):

»Небо и земля« ...

(Цѣла друга дѣя есть освѣтлена бенгалским огнем).

Е. Жеропа



ПѢСНЯ.


Ой, ты дубе, зелененький, А ты мене залишила
 Зелена дубраво, В каламутной водѣ,
 А ты мене залишила И ты плачеш и я плачу,
 Моя родна, мамо! Заплачеме обѣ.

(Н. Студене)

Подаав: Мазур Михайло
 ученик нар. школы



Золоте яблоко.



е раз
 бив,
 де не бив,
 бив раз
 один пару-
 бок, та си-
 ла у него
 была над-
 людска.
 Подумав
 он, в собѣ,
 що не є що

ему дома сидѣти з такою силою, але треба ити в свѣт — щастя пробовати. Та и пошов. Иде, иде, раз лиш серед широкого мертвого поля найшов велику величезну палату. Окна на нѣй были як десять дверей на церквах, а дверѣ як сто ворот звычайных. »Ой, тут має жити який то поправдѣ «великий» пан,« думав собѣ парубок, по имени Иван, и застукав у дверѣ.

У окнѣ появилась велика величезна голова. Иван з першу думав, що якась велика бочка. Загримѣла тота голова: »Що ты тут ходиш, червачок чоловічий и безпокоиш сон честных людей!« — »Прийшов з тобою рошибатися,« засмѣявся Иван. Выйшов на то сердито велетень на двор, та почали рошибатися. В окнѣ при том появилась друга голова. А то не была вже як бочка, але красна. Анѣ не велика, анѣ не мала, правѣ така, яку голову може мати найкрасша дѣвка на свѣтѣ. Утямив Иван ту дѣвку, бо так солодко дивилася на него, та од того почув в собѣ подвойну силу. Однакож не мог покласти велетеня на землю. Але и той не перемог Ивана. Заморилися обое. Тогды каже велетень: »Так виджу, брате, ты не хоть який червачок, два такѣ люде як мы, могли бы добыти золоте яблоко!«

»Яке яблоко?« зазвѣдав Иван. »Золоте, що сторожать чотыри львы и десять невидимых велетнѣв! Кобы я то золоте яблоко мав, была бы моя вже ось та дѣвчина!« говорив велетень. »А сяк не твоя?« звѣдав дале Иван. »Нѣт, она буде лиш того, кто добуде ѣй золоте яблоко!« казав велетень.

»Тогды ходѣм, принесѣм то яблоко!« рѣшив Иван и такой був готовый на дорогу.

Пошли теперь обое. Дѣвчина дивилася им обом в слѣд, а не знати котрому желала щастя.

Дойшли до замка, де хоронили золоте яблоко. Велетенъ став та казав: »Я раз дале не йду. Я вже був там — а знаю, що там чекає. Попробуй раз ты сам. У ворот найдеш чотыри львы, коли удасться мѣж ними перейти, спѣши до середины загорода. Там на цвѣтучом деревѣ висить золоте яблоко. Перед ним є желѣзный обруч — а ты мушиш покласти руку в сей обруч и так зорвати яблоко.» — »Се найменше дѣло!« брався до работы Иван. »Попробуй, я вже був под деревом, але посунути руку в желѣзный обруч нѣколи не смѣв!« казав велетенъ.

Пошов Иван просто до ворот замка. Львы спали на порозѣ. Иван не дивився анѣ на лѣво, анѣ на право, просто заскочив у загороду, та и замкнув дверѣ за собою. Не довго блукав, найшов и золоту яблоню и золоте яблоко. Але там був и желѣзный обруч. Иван и туй не роздумовав много, просунув руку крозь обруч та и зорвав золоте яблоко. В той хвилѣ желѣзный обруч збѣгся на руцѣ а Иван почув себе десятираз сильнѣйшим.

Вернувся скоро до ворот. Один из звѣрѣв подняв голову. Иван погладив его по головѣ та лев на то смиренно пошов за ним.

»Тут є золоте яблоко!« казав Иван велетневи, коли дійшов до него. А велетня заляв лютый гнѣв и кинувся зараз на Ивана, абы одобрати яблоко.

Алеж Иван був десять раз сильнѣйшим од обруча на руцѣ, та и гепнув так до землѣ велетнем, що той два днѣ лежав там.

На третий день догонив опять Ивана. Теперь вже спробовав взяти золоте яблоко обманом. При-

ключився до Ивана, та йшли обое, по братски розмовляючи. В полудне одпочинули при березѣ широкоѣ рѣки. Кажє велетень: »Сонце дуже парить, ци не скупали бы ся мы!«

Иван пристав на се. Велетень лиш то чекав, абы Иван розобрався и положив з рук золоте яблоко. Подхопив зараз яблоко, та и втѣк з ним. Иван був сильный, але не мав такѣ довгѣ ноги, як той, та и не мог его догонити. Ишов смутно за ним, журючися, що та чаровна дѣвчина оддасться за ведетня. Але лев взяв его на хребет та побѣг з ним. Велетень поправдѣ був вже у дѣвчины и хвалился своєю хоробростею и золотым яблоком. Але дѣвчина взяла золоте яблоко и подивилася на руку та казала: »Тогды повѣрю тобѣ, коли укажеш и желѣзный обруч!«

Заганьбився велетень и в своѣй злости хотѣв забити дѣвчину чаровну. Але дакто ѣмив его за руки, як бы желѣзным обручем потис. То був Иван, котрый ступив в палату на слова дѣвчины.

Досѣ є, казка є. Иван и чаровна дѣвчина жили дале в щастю и супокою. О том наша казка вже не говорить. То вам скаже лев, котрый остався все з ними та сторожив их. Коли не боитеся, позвѣдайте од него. Найдете его у воротах их палаты.



ЗИМОЮ.

<i>Тето, тето, коляда,</i>	<i>Зима є, зима є,</i>
<i>Дайте орѣх, айбо два.</i>	<i>Зимою ся трясу.</i>
<i>Недастєми орѣшок.</i>	<i>Запряну ослятко,</i>
<i>Однесу вам кожушок.</i>	<i>Поспѣши в козятко.</i>

Брустура.

Невицький



Птица в зимѣ.

»Дакто заклепав у окно« закричали дѣти. Приблизилися а увидѣли, що за окном сидить малый, замерзлый птах и смутно дивиться до теплоѣ, привѣтливоѣ комнаты. Але ледвы утямив дѣтей, застрашено поднявся и тяжкими, вымореными крылами одлетѣв.

»Боятся людей и не смѣе приблизитися« — говорил дѣд Микула. Бѣдный замерз од студени и зомлѣв од голоду. Так радо бы зайшов до нас, наѣстися крышок на столѣ, а боятся. Думае, що всѣ люде суть злѣ, якѣ забивають птахи. Видите, той пташок не має довѣря до людей. А то є смутне!

»Мы бы не кивали его!« говорили дѣти.


»Вы нѣт, але другѣ дѣти айно. Суть дѣти, що мають твердѣ сердца. Стрѣляютъ потята, выбираютъ молодята. Злѣ люде думаютъ, що все на свѣтѣ є для их забавы. То не є правда. Птах жие для себе а не для чоловѣка. Чоловѣк може радоватися, що чує их спѣв. От, дѣти, обѣщайте, що нѣколи не будете губити бѣднѣ потята! Подайте, хлопцѣ, руку на то!«

Всѣ подали руку дѣдови и робили то поважно.

»А не только потятам не будете шкодити: але всему живому: людям, звѣрятам, рослинам. Обѣщайте, що нѣколи нароком не будете их губити!«

Обѣщали всѣ а думали то поправдѣ из сердца.

(Из ческого).



КОЛОМЫЙКИ.

Ой бѣла дѣвка бѣла,	Впала зима, яблоч нема,
Доки яблоч бѣла.	Бѣла шушениць,
А як впала зима,	Сидѣла в петръвочку,
Она змѣзернѣла.	Сидить и в мясниць.

Подав: М. Слюсарчук
уч. IV. кл. горож. шк. в Раховѣ,



Три пряхи.

Одна дѣвчина удалася дуже лѣнивою, нѣяк не хотѣла прясти. Ще иншу роботу даяк докончила, але за кужѣль сѣсти нѣколи не бралася. Одного разу вже так розгнѣвалася єѣ мати, що и вхопила кужѣль та почала ним мастити хребет дѣвчины.

Що сяка робота не йшла тихо, можете думати! Як май тогды порозжовувалася туды королѣвна, та коли вчула той великий плач, зайшла до хатчины — и позвѣдала, що є той дѣвчинѣ, що кричить онь на улицю чути.

Мати ганьбилася сказати правду, що яка в неѣ лѣнива дѣвчина, та казала: »Не вам кажучи, така в мене донька, що нѣяк од кужѣля не одтягнеш. День за днем пряде а пряде, а я бѣдна не можу ѣй постаратися о лену!

»Коли только се бѣда, най прийде твоя дѣвчина до мене, — говорила королѣвна — »у мене лену богато, а сякоѣ дѣвчины шукаю я вже давно!«

Зрадовалася жона та и пустила дѣвчину у королѣвску палату.

Королѣвна завела єѣ в широку комнату, де было повно напхано прядива и казала: »От, тобѣ

лен, коли то скоро попрядеш, то оддам тебе замуж за моего найстаршого сына!» Осталася дѣвчина сама тай и заплакала. Як она мае напярсти се прядиво, коли сама нѣколи не мала в руцѣ веретена. Сѣла при окнѣ та плакала и плакала. А раз лиш засмѣялася. Бо що увидѣла, на том и мусѣла смѣятися. Под окном стояли три жоны, але якѣ: в одноѣ одна нога выросла як бубен, у другоѣ палець розширився, у третоѣ губы утучнѣли, як перина. Уви-

дѣли и сѣ чуднѣ красоты дѣвчину, та зазвѣдали: чому мае такѣ выплуканѣ очи. Дѣвчина была до

бесѣды дуже трѣбна, зараз и розказала цѣлу свою долю, та и заплакала опять. »Се найменше дѣло!« казали тѣ жоны. »Мы тобѣ за день и ноч все прядиво спрядеме, только прилич и нас на твое весѣля и гости нас, як твоих тѣток!« Пристала дѣвчина. На що бы была она не пристала. Запустила трюх пряшок до комнаты. Сѣли они за кужѣлем та и не встали, доки все прядиво не было попрядено.

Зайшла дѣвчина до королѣвны голосити, що робота готова, Зрадовалася королѣвна, зрадовався



и королевич, що достане сяку спѣшну дѣвчину за жону.

Зробили весѣля. На весѣля прикликала дѣвчина и своих »тѣток.« А королевич не мог доста чудоватися, що як добула така гарна дѣвчина таких немоторных родачок.

Доти чудовався, що и не мог вытерпѣти. Приступив до тѣток и зазвѣдав:

»Чого у вас, тѣтонько, одна пога така велика та плескувата?«

»Прядучи, богато приступувала нею, серденько, од того и выросла,« казала тѣтка.

»Чого то, тѣточко, у вас губа так надулася?«

»Прядучи, нитку слинила, голубе, од того она и надулася.«

Королевич приступив и до третої: »Од чого то у вас, тѣточко, палець так напух?«

»Прядучи, нитку сукала,« казала тота.

Тогды злякався королевич и казав своїй жонї:

»Но, ты моя, люба жоно, од нынѣ доки жиєш, не смѣєш взяти до рук веретено, бо бѣда буде!«

Было дивованя, що дѣвчина не заплакала и так легко пристала на сю кару. Всѣ хвалили, що яка послушна жона.



ПРОГОВОРКИ.

Там в городѣ воды не є,
 Бо выпили конѣ,
 Там в городѣ лѣдей не є,
 Самѣ босорконѣ.

Подав: И. Черничко,
 учен. III. кл. гор. шк. в Бѣлках



Своя дѣтина найскраша.

Дав пан циганинови яблоко и каже: »Понеси та дай той дѣтинѣ, котра найкрасша в селѣ!« Циганин пошов, обойшов цѣле село а на конець дав яблоко своѣй дѣтинѣ.

Пошов потому до пана и казав: »Паночку, я обойшов цѣле село, а красшоѣ дѣтины не находив як моя!«

(Ясъня)

Подала: Олена Митничук.



ДѢТОЧА ПРИПОВѢДКА.

Жанга, жанга

Принала ня мамка,

Кто дастъ воску,

Помастити дошку.

Кто дастъ пан буде.

Кто не дастъ Иван буде.

(Кричово)

Подал: В Бенца

уч. III, гор, шк. в Тячовѣ.



Людский вѣк.

Коли Бог сотворив свѣт и почав призначовати кождому сотворѣню довжину вѣку, то прийшов до него осел и зазвѣдав! »Боже, ци довгий вѣк призначив ты менѣ жити?«

»Трийцять лѣт,« сказав Бог. »Ци доста буде?«

»Ой, Боже, милосердный,« зотхнув осел. »Се дуже много. Згадай, що я все житя терплю. Од самого рана до позноѣ ночи тягаю накладенѣ возы,

а ще и їсти не дають! Будь милосердний, скороти мой вѣк!»

Бог змилюсрдився и скоротив его вѣк на вѣсѣмнадцять роков. Выйшов осел вдоволеный из палаты а за ним приступив пес.

»Чи довго хочеш ты жити?» спитав од него Бог. Трийцять лѣт ослови здавалося довгим вѣком, чи тобѣ буде доста?»



»Ой, Боже, не карай мене так!» говорив пес. Подумай, колько мушу я бѣгати, гавкати, — а до того терпѣти голод и холод. Потому як постараѣю, выпадуть зубы, голос захрипне, що буде из мене?»

Видѣв Бог, що пес говорить до дѣла, придѣлив ему 12 лѣт вѣку. Тогды прийшла малпа.

»Но, тобѣ видав не буде много трийцять лѣт. Твой живот и так все веселость та посмѣх!» казав Бог.

»Не дай Господи!» зажурилася малпа. »Що я зроблю за так довгий вѣк. Правда, надомною всѣ люде лиш смѣються, але вѣрь менѣ, Боже милосердний, то лиш я знаю, колько я терплю при том, нераз слезы течуть! Нѣт, трийцять лѣт, то менѣ много.»

Подумав Господь и даровав малпѣ десять роков. На конець прийшов чоловѣк.

Каже ему Бог: »Так тобѣ дам трийцять лѣтъ, може тобѣ не буде то много!«

Зажурился чоловікъ и почав скаржитися: »Як ты мене караєш! Тадь се зовсѣм мало. Подумай лиш собѣ, збудую хату, наладжу коло хаты деревце, наколи оно вырасте, зацвите и зачне родити, менѣ вже прийде умирати. Боже милосердный, продовжи менѣ вѣк!«

Казав на се Бог: »Добрѣ, додам ще тобѣ 18 лѣтъ ослячих!«

»То ще все мало!« журился чоловікъ.


»Так най будут тобѣ ще и собачѣ 12 роки!« додав Бог.

»Однакож мало,« говорив чоловікъ.

»Так бери ще и малпячих десять роков, а йди собѣ, больше тобѣ не даю!« одповѣв Бог.

Чоловѣкъ одойшов, але не був вдоволенный.

То и жиє чоловікъ сѣмдесять роков на сѣм свѣтѣ.



ПѢСНЯ.

Ой, зазулько сивенькая,
 Чом теперь не куєш?
 Мати моя. миленькая,
 Чом мя не жалуєш?
 Тогды я тя, моя донько,
 Буду жаловати,
 Коли буде зозуленька
 В осени кувати,

(Драгово)

Подав: Ст. Росоха,
 ученик гимн. в Береговѣ



Одки є зазуля?

Была одна жона та мала она дѣвчину. Выправила мати дѣвчину кожного дня из маржинами у лѣс. Ходила дѣвчина из маржинами та в едно з нею ходив парубок — чорт, по имени Кукул. Як явися Кукул, лиш закричав на маржины, абы стали коло пня. Маржинка стала и стоїть, доки сонце не заходило и не треба было дѣвчинѣ вертати до дому.

Сяк маржинка не абы тыла на пашѣ, а стали худѣти. Подумала мати пойти раз в лѣс подивитися, як єѣ донька выпасує худобу. Чорт Кукул доброго не вѣщовав, сего дня не прийшов у лѣс.

А дѣвчина ходила по лѣсѣ та кликала: »Гей, Кукуле, де ся дѣв?«

Учула то єѣ мати, та сказала: »А кукала бы ты, доки сего свѣта!«

Тогды дѣвчина поднялася, та збила в крыла, закукала и полетѣла.

Од тогды є зазуля и кукає у лѣсѣ.

Кричово.)

Подав : И. Кричфалушій,
ученик гор. школы.



МАЛА ИЛЯНА.

Ой, десть была, небого Иляно?

Жито жала, люба моя мамо!

Щось зажала, небого Иляно?

Три короны, люба моя, мамо!

Та дееѣ дѣла, небого Иляно?

В гуслѣ верила, люба моя, мамо!

Як ти играли, небого Иляно?

Шинди-ринди, люба моя, мамо!

Защось дала, небого Иляно?

Кортѣло ня танцювати, люба моя, мамо.

Подав : Гавріил Мешко
ученик гимназіѣ в Ужгородѣ





ВЫНОЧОК

ДЛЯ ПОДКАРПАТСКИХ ДѢТОЧОК.

Выходить каждого мѣсяця як прилога новинки: **»Наш Родный Край.»**

Редактор: А. Маркуш. — Предплата Кч 10— на рок. Поодинокое число 1 Кч.

Для школярѣв: на рок 6 Кч, поодинокое число 60 геллеров.

..... Адреса: **»Наш Родный Край« Тячево.**

Рочник VIII.

Фебруар 1927.

Число 6.

А ХОТЬ БЫ Я...

А хоть бы я, молоденька,
Три ночи не спала,
Не повѣлаб чужа мати,
Що я рано встала.

А хоть бы я, молоденька,
Три днины не тла,
Не повѣлаб чужа мати,
Що я золоднѣла.

Подав: Никола Щербей,
ученик III. кл. гимн. в Ужгородѣ.



Кто найсильнѣйший?

Колись у давных, предавных часах — коли ще сякѣ дѣла ставалися — жив у густом, залишеном лѣсѣ богобоязливый чоловѣк и своею молитвою служив Богови.



Жив сам на самотѣ, анѣ одна птиця, анѣ найменше звѣря не заблудило нѣколи на той край — только одно сернятко приходило часом одвѣдати Раз, як молитѣся старый, дащо заквичить над ним та упаде перед него мале мышенятко. Зрадовався старый, що буде мати товариша. Ухопив мышенятко та и погладив. А то в той хвилѣ перекинулася мыш у хлопця, а ще так гар-

ного, що треба было бы ходити много по свѣту, абы ще одного такого найти.

Остався хлопчик з старым, та по сему двое хвалили Бога. Рос хчопчик, рос, та и вырос великим парубком. Вже надоѣ ему нѣчого не робити, а на самотѣ жити. Увидѣв старый, що его товариш, чим дальше, тым больше журиться. Казав раз ему: »Я знаю твой смуток. Кажи, куды ити, яку дѣвку тобѣ засватати!«

Парубокъ одповѣвъ: »Я можу засватати лиш од того, кто є найсильнѣйший на свѣтѣ!«

»То може быти сонце над нами,« думав старый и пошов у сваты до короля сонця. Кажє ему сонце: »Не на добром мѣстѣ ходиш! Я лиш доти сильный, доки чорна хмара не закрые мое лице. Тогды вже и минула моя сила!«

Пошов старый до чорноѣ хмары. А тота ему: »Сонце правду говорило. Я сильнѣйша од него. Але є ще и од мене сильнѣйшого. То є вѣтер. Коли подхопить мене, туды жєне, куды хоче!«

Пошов старый до вѣтра. Вѣтер послухав его та и одповѣвъ: »Анѣ я не єм найсильнѣйший! Диви от та гора, тота сильнѣйша од мене! Дарьмо бюся всею силою до неѣ. Она лиш смѣєся — та не одступає з дороги!«

Старый почав удивоватися, але пошов ще и до горы. Гора одповѣла ему: »Правда, що я сильнѣйша вѣтра. Однакож, мушу признатися, є одно сотворѣня, що сильнѣйше мене. То малє мышенятко. Оно рыєся у менѣ по своѣй волѣ. Будує подземнѣ ходы, палаты, од мене анѣ не звѣдаєся!« »Мышенятко є сильнѣйше, чим я,« докончила гора. А онѣ слезы ѣй выкотилися.

Вернувся старый у лѣс — и розказав хлопцеви куда ходив и що видѣвъ-чув.

Хлопець засмѣявся и одповѣвъ: »Погладь мене щєраз на прощаня!«

Погладив старый хлопця, а той перекинувся опятѣ в мышепятко та и щєз.

Од тогды жив старый опятѣ на самотѣ.



ПРОГОВОРКА.

Де ты была, донечко, им, донечко?

Гуси пасла, мамочко, тея, гоя, им!

Що ти дали донечко, им, донечко?

Три золотъ, мамочко, тея, гоя, им!

Як ти гули, донечко, им, донечко?

Три-ли-ли-ли, мамочко, тея, гоя, им!

Як єсь грала, донечко, им, донечко?

Гопо-по-по мамочко, тея, гоя им!

Подав: Юлій Кормош
уч. гор. шк. у Бѣлках



За один пѣняз девять вепрѣв.

(Народна казка.)

Жив собѣ чоловѣк, та був дуде худобный. Окрем малоѣ хатчины не маз нѣчого. Але мав трьох дѣточок, а тым ѣсти треба. Одного разу пошов той чоловѣк у лѣс по дрыва та найшов один пѣнязь (грош). Вернувся додому и казав жонѣ: »Паруй, жоно, тайстру, завтра иду на торг, куплю дащо за пѣнязь!«

Як ишов на торг, стрѣнув чоловѣка, що гонив девять вепрѣв. Казав ему бѣдный чоловѣк: »Купив бы я од тебе якого вепря, але маю лиш один пѣняз!« Як здивовався бѣдный чоловѣк, коли купецъ одповѣв: »Я дам тобѣ єсѣ девять за один пѣняз. Але через один рок прийду до тебе и тогды маєш одгадати ту загадку, що я тобѣ скажу. Коли не угадаєш, то даш назад вепрѣ а ще и житя прикладеш!«

Пристав бѣдняк на все и радостно погнав до-

дому вепрѣ. За токму нѣчого не сказав дома — а жили собѣ в достатку. Але минув рок. Бѣдняк правѣ на той день зарѣзав девятого вепря. Як сѣла цѣла фамилія за гостину, заклопали на дверях. Бѣдняк думав, що то вже его купець. А то были два святѣ вандровники. Прияв их бѣдняк радостно, посадив за стол та и гостив. Але сам журился и все дивился на годинник, ци далеко ще до повночи. Вандровники зазвѣдали, чому он журиться, та он и розказав им все, що в повночи має прийти купець за вепрями и за его животом — бо он напевно не одгадає его загадок.

»То лиши на нас!« казали вандровники.

В повночи поправдѣ закричав дакто под окном: »Ци ты спиш, чоловіче!«

Один з вандровников одповѣв єму: »Ой, дай покой, и сплю и не спю!« — »Та не спи, але зачни одгадувати,« говорив той под окном. »Що є одно?« Подорожний одповѣв: »Одно є сонце!« — »А що два?« Той знов: »Двѣ очи!« — »Що три?« — »Тройця свята!« — »Що чотыри?« — »Чотыри дойки у коровы!« — »Що пять?« — »Чотыри колеса, пята рудина!« — »Що шѣсть?« — »Пять пальцѣв шеста долоня!« — »Що сѣм?« — »Де сѣм дѣвок там суть вечерницѣ!« — »Що восѣм?« — »Де восѣм хлопцѣв там є сварка!« Чоловѣк под окном онь скреготав зубами од лютости, бо дотеперь на всѣ загадки одповѣли єму. Подав и послѣдню: »А що девять?« Се вже и сам бѣдняк выгадав; отворив окно и так закричав: »Девять вепрѣв за пѣнязь!«

На се под окном лиш зашелестѣло, а купець — нечистый дух — зник.

(Б. Бычков)

Подав: Йосиф Смердуль



ПРОГОВОРКИ.

А я дыню одкопала
 Прийтла свиня та узяла,
 А я свиню поза уха,
 Свиня каже: «Я не муха:»
 А я свиню перед попа
 Свиня каже: «Я не тота!»
 А я свиню перед пана,
 Свиня каже: «Я не брала!»
 А я свиню перед дяка,
 Свиня каже: «Як вам дяка!»

(Розтока)

 Записав: Михайло Грига
 ученик нар. школы.


Паличка-слухняночка.

Была раз дѣвчина сирота. Не мала она нѣкого на свѣтѣ. Цѣлый єѣ масток був одна паличка, яка осталася на нею од маточки чаровницѣ. Ту паличку мала дѣвчина носити при собѣ 20 лѣт — а тогды все обернеся на добро. Сяк говорила ѣй покойна мати, доки жила.

Носила дѣвчина паличку, та блукала по свѣту. Ци тут, ци там наялася у роботу. Сама не знала, колько лѣт має, ци довго ще чекати, абы все обернулося на добро. Але палички нѣколи не оддала од себе.

Сяк блукаючи по свѣтѣ — досталася она аж в королевский город — и наялася за служницю до самого короля

Служила, служила. Мѣсто было доброе. Кухарки честнѣ и богобойнѣ. Из панов дѣвчина нѣкого не видѣла. Не мала з ними дѣла.

Раз у сусѣдного короля готовили велику забаву, що мала держати три днѣ. Вѣсти о сѣй забавѣ зайшли аж до кухнѣ. Цѣлый день о томъ говорили в кухни, що яка славна то буде забава, колько там буде прегарных принцов и принцезн. Дѣвчина слухала-слухала сѣ розмовы — а вечер коли вже лѣгала спати и одкладала паличку воз-



дыхнула: »Ой, кобы могла и я там быти!« На се и потряслася палочка в еѣ руцѣ та почала еѣ тягнути. Тягла, тягла та потягла до величезного дуба, який стояв недалеко королевскоѣ палаты. В том дубѣ найшла служниця сѣрѣберне убраня, а перед дубом сѣрѣберну карету.

Убралася дѣвчина, сѣла у карету та и поѣхала

на забаву, Як зайшла, очи всѣх на нѣй стали. Всѣ принцы лиш з нею хотѣли танцювати, а найбільше обертався коло неѣ принц з палаты, де она служила.

Гуляла дѣвчина майже до зорѣ. Але паличка раз лиш ударила єѣ. Дѣвчина порозумѣла, що час ити до дому. Збѣгла на ступнях, сѣла в карету — лиш махнула паличкою а нѣкто не утямив, куды зникла.

Рано вже была в кухни и робила, що єй розказали, при том слухала як говорить кухарки — о таємной принцезнѣ, яка была на забавѣ — та о королевичеви, котрый вернувся з забавы дуже засмучено и сердито. Теперь дораз устане, але нѣкто не смѣе єму занести чоботы. Доти шептали, доти шептали, що раз лиш дали до рук служницѣ чоботы, абы занесла она.

Дѣвчина занесла. Королевич був страшно сердитый, взяв чоботы та и закричав: »Видав се тобѣ чистѣ? Коли научитеся вже чоботы чистити?« Тым и ударив дѣвчину чоботом. Дѣвчина заплакала, та и смутилася цѣлый день. Але на вечер опять взяла паличку та до дуба. Там найшла теперь золоте убраня и золоту карету.

Як зайшла на забаву, опять всѣ принцы лиш з нею хотѣли танцювати. Але она выбрала свого домашнього, бо правду сказати, той ѣй найлучше сподобався. Принц радый и веселый танцював и розмовляв. Мѣж иншими зазвѣдав и то, що з котрого краю є она. Дѣвчина сказала посмѣхуючися: »З чоботоудару.« Як почало зоряти, дѣвчина опять зникла. Нѣкто не утямив, коли и як.

Королевич побѣг також додому — без тоѣ ча-

ровноѣ принцезны не мав дяки до забавы. Созвав зараз всѣх радников, абы сказали, де то є такой край: »Чоботоудар!« Нѣкто не мог одповѣсти.

Злостився королевич, що на цѣлу палату розбѣгся страх. Рано з чоботами заслали опять служницю сироту. Королевич анѣ не дивився на чоботы, ухопив щѣтку з столика та и потрафив нею служницю просто у голову.

Засмутилася дѣвчина, що то єѣ принц так єѣ честує. Однакож на вечер опять пошла на забаву. Теперь мала вже діамантове убраня. Опять цѣлый вечер лиш з тым одним королавичем заѣавлялася. Той все допрошував, кто она є, як ся зове. Она нѣбы то не чула. На конци сказала: »Цинероза Поголовѣщѣткой.«

Королевич думав, що се є по латинѣ, а не додумався. Приходила зоря. Паличка вже двараз пильновала дѣвчину, але она не много дяки мала до одходу. Бо се був послѣдний день забавы. Але коли паличка потрясла и третей раз — а то вже сердито —, подхопилася дѣвчина, збѣгла до кареты та и одѣхала. Але королевич всюды за нею. Ледвы могла зникнути. Переодягнутися вже не мала часу, только натягла на діамантову одежу, свою просту кухонну, та и стала до своеѣ работы в кухни.

А королевич нѣяк не мог похопити, де зникла его принцезна. Головно того не розумѣв, що зникла дагде близь их палаты, Почав роздумовати над дивными именами »Чоботоудар,« »Поголовѣщѣткой!« Доти роздумовав, що и дав приликати служницю кухарьку, абы розчесала ему волося.

Зайшла служниця, почала чесати волося королевича, а через рѣдку єѣ одежину все перебивався

близк діамантової одежі. Подивився королевич, що там блищить, потому подивився и на дівчину. Та зараз и спознав.



Дальше не треба ані казати. Зробили таке весілля, що кухарки три тижні день и ноч не перестали варити. И я там був, три тижні їв, пив и гостився, на кiнець голоден зостав.



НАРОДНА СПІВАНКА.

Ой, скочив я з оборога.
 Будь рыбко здорова!
 Вбалила з ня клєбанину
 Голузька сливова
 Волъла та клєбанина
 Навхтема пропасти
 Як я такий молоденький
 У гiньбу упасти!

(М. Раковець)

Подала: Марія Поляк
 учениця IV. р. нар. школы



Заяць та лисиця.



Ишли раз по дорозѣ заяць та лисиця. Зима была тверда, до того вже третій день нѣчого не ѣли. Нарѣкали обое на злѣ часы, на лиху години. Як идуть и видять що иде против них дѣвчина а несе великий кошик в руцѣ. Перехитрѣм єѣ, може дащо буде в кошику — казала лисиця. »Добрѣ,« пристав заяць. Але як од неѣ взяти

кошик? »Ты ляжь тут серед дороги, нѣбы то мертвый. А я затягнуся у ярк. Може удасться,« роздѣлила лисиця задачѣ. Заяць, хотяй розума у него не онь дуже много, також похопив о що иде дѣло.

Зробили як казали.

Иде дѣвчина иде, раз лиш мало не зашпотаєся у заяця. »Ох, то тут заяць,« закричала. Поклала кошик на дорогу, сама яла поднимати заяця. Лисиця лиш сего чекала. Ухопила кошик та до втечи. На то ожив и заяць та пустився за лисицею.

Догонив лисицю край лѣса, коло потока. Лисиця вже переглядовала, що є в кошику. »Самѣ паляницѣ и того мало,« казала до заяця. Заяць из всего вже знав, що ему мало передасть лисиця з добычѣ. Роздумав заячик дащо та и каже: »То и не варта саме ѣсти. Кобы до него рыбы наловити, як тут недавно наловив вовк, то бы было гостина. Сухѣ паляницѣ и свѣжѣ рыбы до того!« По-

текла слина лисицѣ на еѣ бесѣду. А як то бы мож рыбы наловити, зазвѣдала. »То не велика штука,« казав заяць. »Пусти хвост у воду, у тебе доста довгий. Теперь рыба голодна, зараз и причепиться!«

Зробила лисиця, як заяць казав. Пустила хвост у воду — у прорубѣ — а хвост и примерз.

Взяв заячик кошик та солодко зѣв паланицѣ, одну за другою кажучи: »Подѣлимся. Менѣ паланицѣ, а тобѣ рыбы!«



Вовк у сѣтцѣ.

Одного вечера поставив фешнер в лѣсѣ сѣтку на вовка. Другого рана прийшов з двома помочниками подивитися на сѣтку. А сѣтка нѣгде не была. Глядали, глядали, та скоро найшли слѣд вовка, шо тягнув по снѣгу сѣтку. На краю лѣса найшли под деревом замерзлого вовка з сѣткою на нозѣ. »Сей вже здох, не треба анѣ стрѣляти!« казали. Фешнер зняв сѣтку а вовка дав помочникам, абы понесли до дому. Он сам пошов ще дальше у лѣс. Один з помочников взяв на плече вовка, а другий ишов за ним у слѣд. Раз лиш закричить той задный! »Вовк клѣпає!« Другий помочник хотѣв подивитися ци правду той говорить. Поклав вовка на землю. Вовк лиш того чекав, схопився, та лиш вѣтер за ним загучав. Сяк vyrатовали вовка од смерти.

Подав: Мерза Лудвик.



ПРОГОВОРКА.

Годовала бабка цапка
Под припѣчком лупинком,
»Чом ты, цапку, не тыеєш?«
»Так мя, бабко, годуєш!«
Взяла бабка кол дубовый,
»Гайда цапку, у дуброву!«
Цапику сам пасися,
Од вовка сокотися.

(В. Комята)

Подал: Галас Юрко



Королѣвскѣ сыны.

Се, моѣ дѣточки, не знаю ци правда, або только выдумка. Бо нѣкто там при том не быв, як старый король загаяв сынов на вандровку. А про-то оно може быти правдою, бо мой небощик дѣдусь, коли менѣ се оповѣдав, все говорив: »Я там при том не быв, але се мусить быти правда!« Слушайте, як то оно было.

Жив, де не жив, жив старый король и мав трьох сынов. Двох старших любив, а третьего дурным назвав. Раз два старшѣ сыны одпросилися на вандровку, Ходили, ходили, та и вернулись назад, нѣчого не видѣли, нѣчого не добыли.

Пошов тогды дурный.

Сѣв на худого коня, та їде. Ёде, їде, стрѣчає старого дѣдуса на ослѣ. Зазвѣдає дѣдо: »Куды сыну?« — »У сваты за Червеное море,« хвалиться дурный. »Пойте и вы з мною!«

Ёдутъ двое та дойшли до Червеного моря. Там и стали, бо дороги дальше не было. Каже дѣдо:

»Коли ты мене так красно звав, теперь и я оддячуся.« Учинив крест на море, а на морю учинився такой причудный путь, лиш ступати на него.

Поѣхали тым путем, прямо ид королевскому двору. И почали дуже красно в сопѣлку грати. Як вчула то дѣвка королевска, то и выбѣгла подивитися, кто так красно грае. Выбѣгла, подивилася, а Дурный и подхопив еѣ на коня та повернули назад. Дѣвчияа анѣ слова не сказала, так полюбилася ѣй сопѣлка та парубок, що на нѣй грав.

Ѣдутъ, Ѣдутъ, Дурень на кони, дѣдо на ослѣ та и дойшли на мѣсто, де стрѣнулися. Каже тогды дѣдо: »Я дальше вже не иду з вами. От вам мой дарунок: золотый конь и золоте потя. Жийте щастливо! Ты сыне, маеш жону из за Червеного моря и золотого коня та золотое потя; сокоти на них. Будеш ити коло рѣки, та абы ты не став там воды пити, бо всьо загубиш.« Дѣдо сим зник а они ѣхали дале. Раз и доѣхали до великоѣ рѣки. Дурный дуже був утомленный и став спочивати. Мав велику жажду на воду. Говорить жонѣ: »Я напюся хоть мало воды!« Дарьмо просила жона, не мог розказати своѣй жаждѣ — поправдѣ напився — та и заснув од тоѣ воды. Заспав твердо навѣки. Надойшов туда брат Дурня, забрав и коня и потя и дѣвку, та понѣс у палату отця. Дѣвку побожив, абы нѣкому не сказала правду.

Зрадовався старый король, що его сын принѣс таке богатство, розказав приготовить все до свадьбы, А Дурный ще все лежав коло рѣки. Доти лежав, доки дѣдо не мав туды дорогу та не найшов и не оживив. Заплакав Дурень, що пропали и дѣвка и дарунки дѣдуся. Казав тогды дѣдо: »Щераз тобѣ


поможу. Дам тобѣ таку иглу и ножички, що самѣ будуть робити. Бери та иди скоро и просися до того кравця, що близь быває коло палаты твоего отця. Так робив Дурень. Кравець правѣ тогды шив платя на корольску невѣсту. Радостно прияв помочника. Дурень казав кравцеви: »Лѣгайме спати, моя игла зшиє сама то платя.« Доти говорив, що кравець послухав. Лягли обое спати. Рано, як пробудяться, дивляться а на столѣ готовое платя стоить. Приходить рано и молода за платем, та зараз спознала єѣ правдивого молодого. Побѣгла до палаты казала: »Доти не пойду божитися, доки не приїде на свадьбу кравець и его помочник!« Послав король за кравцем и его помочником. А помочник прийшов в таком убраню, що было из чистого золота. Коли зайшов в двор, золотое потя начало гойкати: »Туй мой пан! Туй мой пан!«

А золотый конь начав реготати: »Се правда, се правда!« И сяк дозналися всѣ, що золотого коня и золоте потя та и корольвску дѣвчину добыв найменший королевич.

Зробили свадьбу на три державы. И я там на том весѣлю був, пив, танцював. А там было весло, дому ня принесло. А там было метло, путь за мной замело.

Мих. Иваник,

учен. II/б кл. горож. шк. в Мукачевѣ.



ГУЦУЛЬСКА ПѢСНЯ.

Изийшлися два гуцулы коло яворова

И сталася межи ними такова розмова,

»Ай, де гостиш, товаришу, изкажи ми мало!«

»Не скажу ти, товаришу, бануєш немало!«
»Ай, де гостиш, товаришу, в яковом дѣль?«
А, я гоцу по докторах, аж до Коломыть!
А, зыйдѣмся край дороги, садѣмєсть в ворость,
Посербайме гусяночки, та розмовимось!
Посербали гусяночки, попахали люльки,
Здалобься небощикам зарати гуцулки.
»Мы гуцулки не вмѣємо, анѣ подолѣвки!«
Здалобься небощикам выпити горѣвки.
Та выняли фляш из торбы, та зачали пити.
Здалобься небощикам кулєшь зварити.
Ой, кулєши изварили, люльки запалили,
Тверда ружа ударила, коньми попутили.
— Ой, ци знаєш, товаришу, Сопѣлку Стѣмена,
Яка в него байдуречка, премудра зложена.
Яка в него байдуречка, такѣ в него ношѣ,
За чересом скрутюн, тютюн, не боялисьмось.
За чересом скрутюн, тютюн, а часом шумѣвка
А довкола пистолеты, а ще дубелѣвка.

(Ростока)

Подав: Михайло Грѣа,
ученик IV. кл. нар. школы.



Oxford[®]



No. IDT411 RT

**If Slimtrim Fasteners are to be included, please specify.
Spécifiez si vous voulez des agrafes Slimtrim.**

Distributed by / Distribué par:

✠ ESSELTE CANADA INC.

